

光緒順天府志

人物志七

光緒順天府志

先賢七

黃岡洪良品纂江陰繆荃孫釋

明

劉士原

王二共

劉英

甄庸

李慶

賈信

兄子琳
榛柏

張素

李敷

李秀鼎

董子和

劉中敷

子璉
孫機

秦亨

武周文

王騏

子復

李儀

李侃

董方

岳正

邢表

李賓

芮劍

劉聰

施聚

金純

朱驥

紀常

子誠

劉志

趙某

駱貴

李東陽

陳壯

楊墳

田景賢

歐信

燕忠

張禕

王鎧

周榮

邢昭

張翰
蕭選

賈斌

張欽

楊秦

頓銳

安璽

王誥

張詩

楊行中

子鎰

子世揚

王儀

子緘

徐珽

楊淪

陳堯

王佩

喬伊
朱乾亨

馬慎

劉體乾

王遴

王鈇

高敏學

毛綱

劉效祖

宗禮

李松

福時

王价

王時舉

崔鑑

王原

李亨廷

姜璧 孫銓

楊惟清 弟惟治

王大用

明

劉士原昌平人洪武中以才能薦舉擢潞州知州有惠政遷陝西參議累官左布政使朝覲入都止跨一蹇驢帝廉得其實稱揚不已命馳驛赴任時有天下清官劉士原之譽 昌平志王二共武清人

洪武時由人才授長安令民謠曰村落安堵賴有王明府 畿輔志唐四尋捉東平州知州歷官鳳翔府知府 武清志

劉英寶坻人洪武中由辟舉知繁峙縣廉能守法深得民心 畿輔志七十以抗疏言事解官去 山西通志邑人爭詣闕留之上顧左右曰安

有得民如此而肯爲紕政者哉命還其職以愜人望後考滿改雲陽縣繁峙人至今祀之 寶坻志

甄庸宛平人洪武時舉人才授戶部主事永樂元年陞松江知府

政平訟簡二年降右軍都督府經歷三年擢山西道監察御史巡

撫廣西激揚有體四年陞工部侍郎累官南京兵部尚書庸性凝

重言若不出諸口遇事處之綽有餘裕人稱篤厚君子勸輔唐志七十四

李慶字德孚順義人幼有異相長於兵順義黃志洪武中以國子生署

右僉都御史明史列傳剛直不畏強禦遇事侃侃爭論人嚴憚之萬曆沈志

五 後授刑部員外郎遷紹興知府永樂元年召爲刑部侍郎有幹

局馭下甚嚴帝以爲才數命治他事不得時至部然屬吏與罪人

交通私饋餉慶輒知之繩以重法五年改左副都御史兩遭親喪

竝起復時勳貴武臣多令子弟家人行商中鹽爲官民害慶言舊

制四品以上官員家不得與民爭利今都督蔡福等旣行罰公侯

有犯亦乞按問帝命嚴禁如制忻成伯趙彝擅殺運夫盜賣軍餉

都督譚青朱崇貪縱慶劾之皆下吏已劾都督費璫欺罔梁銘貪

暴鎮守德州都督曹得贖貨皆被責中外懷其風采十八年進工

部尚書尋兼領兵部事仁宗立改兵部加太子少保明史大理寺

少卿弋謙言事過激帝不懌呂震吳中及侍郎吳廷用等劾謙誣

罔劉觀令十四道御史合糾謙明紀十一惟慶與夏原吉無所言帝尋

悟降敕自責竝責震等震等甚愧此兩人明史列傳辦山陵事中官有

求執不與至相詆訐不爲動號爲生李一統志王子皇太子謁孝陵

居守南京慶及左諭德周述等從慶在途約束將士秋毫無所擾

太子欲獵慶諫止明紀十一及太子還北京遂留慶南京兵部明史宣

德元年柳升征黎利命慶參贊軍務綱目三十八許擇部曹賢能自隨

明史列傳抵鎮夷關升意殊輕賊明紀十一時慶病甚郎中史安主事陳鏞

亟言於慶曰柳將軍辭色皆驕驕者兵家所忌綱目三編賊或示弱以

誘我未可知也防賊設伏璽書告誡甚切公宜力言之慶強起告

升明紀

升不爲意伏發升死明日慶亦卒軍盡沒

明史列傳

賈信字中孚永清人用季子也

案賈用元時人自有傳

元至正中師事固安

王騏有志聖賢之學凡禮樂名數星厯兵刑食貨水利之類皆熟究之性孝友父歿未葬火焚其廬信搏顙額天火至柩所忽滅及營葬親負土石感疾良久乃瘳明初盜掠縣城信從子珍被執信挺身告賊曰此吾兒子甯執我勿苦彼也賊數聞其名欲降之縛於柱信不爲屈至夜給守者脫歸集里民爲義兵擊破賊俄官兵至悉平之官欲盡誅望誤者信走說曰貧民迫凍餒耳誅之寃矣官然其言置不問信喜談兵膂力過人善弓矢刀槊馳馬若飛又好書每事他出必以書冊自隨遇佳山水輒徘徊終日善詩尤工書法宣德五年卒年七十歲兄子琳

永清周志

琳字崑玉信長兄智之子也少力學工文辭洪武中以太學生授山東東昌府照磨府號煩劇而軍衛尤橫數鞭辱府中佐史前官率不能堪琳執法嚴軍衛有非理事皆抗弗從民由是賴以少安有繼母訴子不孝琳呼至前委曲開譬母子泣謝去卒以孝慈稱嘗治廨後隙地得白金二百兩會部符徵錢卽以金代民輸納建文時將軍盛庸師過東昌卒入民家取酒遂相毆擊一市盡誣琳笞卒遣之卒訴琳罵將軍庸詰之琳曰卒王師民亦王民也民毆且死卒不當笞耶琳雖思何至罵將軍將軍大賢奈何私一卒撓國法庸意解爲責軍士以謝民有干富室金不應遂詣京告大姓陳氏六十人謀亂命錦衣衛千戶劉住往捕之琳廉得實謂僚屬曰朝廷命某佐是郡忍坐觀善良者橫被荼毒耶卽力白上官復令耆老四十人赴闕訴下法司鞠實論告訐者如律爲治廉靜平

恕不畏強悍皆類此正統十二年卒年七十三

永清周志

鉞字廷威別號古燕琳弟瑛仲子也幼好學年少補生員比長膺力過人尤精武畧成化初縣多盜賊剽掠村落人不聊生官吏無如之何鉞身先士卒率其子六人設法擒捕獲其渠魁一十八人

又用間掩捕餘眾賊黨悉平事聞於朝授本縣巡檢司巡檢遇歲飢流殍載道捐俸易米賑恤窮民與知縣共白巡撫乞疏請捐稅不可因發官帑賑之後勸富民出餘粟貸貧者爲定仔息秋稔取償不給則招糴繼之民賴以全活者不可勝計

永清周志

榛宇至亨鉞會孫七歲就外傳日記數百言稍長通六經浸淫百家之說年十八爲生員尤精武略投軍門効力授霸州兵備道中軍守備訓練之暇投戈講藝熟察霸州形勝若防若守相視險易俱有成畫鄉練社長守望相助而形勢聯絡軍容肅然上官以是

知其能有大猾從數十人如達官貴人狀假東官龍牌自稱奉令
勾檢山東公事徑過府州縣衛官吏皆不能辨厚致供張多僂儀
物舟車往來少不如意呵斥鞭笞莫敢詰問適過霸州榛偵其狀
疑之不爲供應使人來譁于轅榛曰此僞耳或曰如眞奈何榛曰
卽非僞何得遂擾吾民吾豈惜一官任此輩橫行無憚耶遣使偵
之得一僧與其渠魁對奕於舟乃遣僧至訊鞠之僧亦不知龍牌
眞僞但言自半途誘之使來榛以大舟誘其黨使入舟中卽率健
卒數十人擒之乃知巨猾張差黨屬三十二人械繫至轅立置於
法一時相傳以爲神明擢錦衣衛指揮進京師中營遊擊時內官
橫行傷殘善類榛官京營不避權貴因民間訴冤抑事勾捕揚榮
家奴楊光先遂誣榛與妖僧達觀通謀又誣丁酉鄉試巡視失察
械送法司拷掠備至獄成交遊無敢爲顧恤者謫戍廣東死於戍

所
周志

柏字嵩年，棹再從弟也。柏幼穎悟，一覽輒能記憶。由增廣生員任浙江衢州府經歷。民有親在與弟訟產者，柏曰：訟弟不友，無親不孝。杖而逐之。又有負金不能償，至翁婿兄弟相訟者，柏曰：奈何以財故傷恩？卽出金代償，勸其敦睦。有二卒盜敗舟一板，前官以盜官物坐死。柏曰：兩卒之命抵敗舟一板，耶竟得末減，歲凶請上官發廩以賑。始至召父老問逋稅故，皆言豪戶不肯加耗，並徵之細民，民貧逃亡而稅額益闕。柏方創爲平米之法，令出耗必均。又請敕諸上官頒鐵斛，下諸縣爲準式。革糧長之大小，出爲奸利者。地僻土豪得盤聚爲姦，令長至輒餌以厚賂，賂入因從而把持之。柏至，吏白應往視陳大戶。陳大戶者鉅猾也，柏曰：此非王民耶？不來且誅之。大戶恐入謁柏，廉其不法事繫之獄。詰朝以兩瓜及安

南石榴數枚爲饋皆黃金美珠也柏不視械送府府官受大戶賄
縱之歸復致前饋柏怒欲捕之而府檄調柏他去遂解任歸絕意
仕進優遊三十餘年崇禎二年卒年七十五

永清周志

張素字文質固安人父士學隱居樂善嘗有鄉人入室竊物既見
及反身藏避少頃呼其名諭之曰汝得非饑窘乎其人羞赧跪拜
復與之米麥而去人稱長者素天資秀穎博學多聞少孤事母至
孝母歿廬於墓側哀毀骨立時有瑞草靈鵲之應有司欲上其事
力辭而止永樂己丑登胄監庚子授河南涉縣知縣洪熙初調封
邛縣撫字賢勞政績顯著乞老還鄉以四樂自號士大夫咸題咏
以贈卒年九十二崇祀鄉賢

固安陳志

李敏字居學涿州人

一統志

永樂中領鄉薦入國子監以言事切直

爲仁宗所知授京衛經歷尋除禮部主事累官至四川布政使

涿州

吳敬臨事剛決號令必行

一統志

奸滑有犯者繩之不少貸人稱爲

鐵面李正統初召拜吏部左侍郎卒

涿州續志

李秀鼎大興人永樂初以國子生拜爲左春坊贊善講經書深見禮待爲人博學強記當時號爲書庫及致仕猶訪以時事宣德初

以輔導錄其子

續輔唐志七十四

董子和字有節涿縣人曾大父顯字繼先隱德弗耀大父成由人

材任麻城縣尹父恭相潭縣令

薛瑄董公神道碑

子和幼嗜學通經史大

義居家以孝友著侍父疾

通志

晝夜在側衣不解帶復稽首北辰

求以身代旣而父原水漿不入口者三日幾絕復蘇葬祭如禮而

哀戚過之平日樂善好施人有死無葬具者卽助之棺槨婚姻未

就者卽助之財禮有假貸不能償者卽焚券不復問有鬪辯不能

平者待其一言而決

董公神道碑

里有牧官馬斃法當償者追呼無以

應將自盡子和貸以償之得不死遇蝗旱民不聊生量拯以粟全活甚眾卒年五十八子昱正統七年進士歷官戶部主事員外郎

山東都轉鹽運使有惠政

通州高志

劉中敷大興人初名中孚

明史列傳

洪武三十二年被選守安定門中

心敵臺當年入王府辦事庚辰三月差往保定招撫人民督運糧

儲辛巳差同內官石童守通州八月東軍臨城中敷與陳珪等出

東門外截殺全勝而還

功臣錄一

授陳留丞擢工部員外郎仁宗監國

命署部事賜今名遷江西右參議宣德三年遷山右參政進左布

政質直廉靜吏民懷畏歲大稔言於巡撫減賦三之二

明史列傳

三年官戶部尚書

綱目三編九

王振初用事欲令朝臣畏已導帝用重

典御下防大臣欺蔽自是言官承振風旨屢摠大臣過失以軍官

俸糧改於京倉支給

明紀十三

諷給事御史劾中敷與左侍郎吳璽等

下獄釋還職六年中敷璽及右侍郎陳瑋請以供御牛馬分牧民
間言官劾其變亂成法下獄論斬詔荷校長安門外凡十六日而
釋十一月瓦刺入貢詔問馬駝芻粟數不能對復下獄論斬中敷
以母病特許歸省明年冬當決囚法司以請命璽瑋戍邊中敷俟
母終具奏已釋爲民景帝立起戶部左侍郎兼太子賓客時方用
兵論功行賞無虛日中敷言府庫財有限宜撙節以備緩急帝嘉
納景泰四年卒贈尙書中敷性淡泊食不重味仕宦五十餘年家
無餘貲子璉

明史
列傳

璉正統十年進士授刑科給事中恥華靡居官剛果

明史增補
中敷傳時北

虜入寇以才幹選喜峯口記功有鞍馬文幣之賜後陞光祿寺卿

改遼東苑馬卿卒於官子機

萬曆
沈志

機字世衡

萬曆沈
志四

幼有孝行

明史
增傳

爲諸生時畿郡有鷹神乃一獵

鷹也一日飛止公宅奴以糝飼之偶不潔鷹攫其奴若懲之者居

數日呼公名語曰劉機大貴人他日當坐八人轎至南京語已飛

去機後舉進士

涉異志

爲翰林修撰武宗出閣充講讀官出入三朝

多所裨益

萬曆沈志四

正德中代張綏爲吏部尙書以人言乞歸起南

京兵部尙書參贊機務

明史增傳

劉六等走湖廣劉七齊彥名帥五百

人舟行自黃州順流抵鎮江南京諸司議擇將適都督李昂自貴

州罷官至機卽召任之昂以無朝命辭機曰機奉敕有云敕所不

載聽便宜此卽朝命也眾服其膽識

明紀二

致仕歸卒

明史增傳

工部

治坐禮部論祭者四鄉人榮之機從姪焯字彥光以鄉薦入內閣

秘書從事厯儀部侍經筵恩眷甚厚尋擢參議卒

萬曆沈志

秦亨字子真順天人

畿輔唐志

究性理之學通五經尤長於易

北學

五編永樂初以易學見知於文皇帝召至京師欲處以顯職力辭就

教乃除在平教諭遷永甯府教授

唐志

所至訓迪有方

北學編五

弟子

多有成就已而從尚書黃福征交趾

唐志

既郡縣其地於是編氓

籍定賦稅興學校置官師數召父老宣諭德意一切鎮之以靜上

下帖然

明史黃福傳

多贊畫功乞休歸

北學編五

學者猶質問經史正統間

疾卒

唐志

郡守李瓚觀其造文知學有本原舉以配祀劉忠定祠

北學編五

案畿輔唐志儒學門以先生為順天人而北學編既載先生為大名郡庠生又注引唐志作順天人今從唐志

武周文大興人洪武末以明經入侍燕邸永樂初召為侍講學士

上嘗謂胡廣曰朕在藩邸喜觀易時官僚亦有通曉者不如武周

文言之切實次日周文入謝遂以老乞休

唐志

王騏字秉良號存齋固安人少負奇畧遠謀於經史子傳博覽強

記尤專意詩禮學為文章春容平實不尚藻飾而氣概橫出乎辭

語間補弟子員適永樂初以鄰縣生備城守事定授永清縣主簿

尋調山東蒲臺縣丁憂民吏感惠不忘詣闕保留會有詔求賢
膺薦擢北京行部工曹主事居官廉介不阿爲權貴所嫉左遷河
南舞陽知縣縣多盜標掠村落民不聊生官吏亦被戕害騏設法
捕禁獲其渠魁誅之餘悉喻以禍福縱去歲饑捐俸賑恤全活甚
眾又以賦稅遺輸爲患請折布花之半以供官民至今告便考滿
入京仁宗監國詔諮民隱騏手疏條陳利害數事獲賜馳驛還任
尤留意學校考課諸生日加月益解任之日行李蕭然縣人懷其
德走白當道乞留撫字朝廷嘉其能陞裕州同知仍掌縣事耄倪
歡騰如獲珍璧年五十卒于復

固安
陳志

復字初陽

一統
志

天性寬厚沈靜寡言三歲喪母及長事繼母以孝

聞爲文冲淡善於講解同列謂之王訓詁

固安
陳志

正統七年進士授

刑科給事中陞通政使司左參議景泰初也先擁英宗入關遷大

臣迎駕冢憚行復奮然請往乃遷右通政假禮部侍郎與中書舍

人趙榮

明史列傳

齎捧勅書以行至德勝門外得仰瞻御容頓首拜泣

固安陳志

進羊酒諸物

明紀

也先怒令左右持刀迫脅

固安陳志

復等不爲

懾還仍泄通政事再遷通政使天順中歷兵部右侍郎成化元年

延綏總兵官房能奏追河套部眾有旨獎勞復以七百里趨戰非

宜且恐以僥倖啟毀請赦戒諭帝是之進尙書錦衣千戶陳珪者

本畫工及卒從子錫請襲百戶復言襲雖先帝命非軍功宜勿許

遂止

明史列傳

二年六月毛里孩大入延綏

明紀

十八命復出視陝西邊備

自延綏抵甘肅言延綏東起黃河岸西至定邊營接甯夏花馬池

榮紆二千餘里險隘俱在內地而境外乃無屏障止憑墩臺以守

軍反居內民願居外敵一入境官軍未行民遭掠已盡矣又西南

抵慶陽相去五百餘里寇至民猶不知其進北墩墩率皆曠遠非

禦邊長策請移府谷響水等十九堡置近邊要地而自安邊營接
慶陽自定邊營接環州每二十里築墩臺一計凡三十有四隨形
勢爲溝牆庶息響相聞易於守禦又言甯夏中路靈州以南本無
亭燧東西二路營堡絕聲聞不屬致敵每深入亦請建置墩臺
如延綏計爲臺五十有八又言甘肅永昌西甯鎮番莊浪俱有險
可守惟涼州四際平曠敵最易入又水草便利輒經年宿留遠調
援軍兵疲銳挫急何能濟請於肅州五衛內各分一千戶所置涼
州中衛給之印信其五所軍伍則以五衛餘丁選補且耕且練斯
戰守有資兵威自振又言洪武間建東勝衛其西路直達甯夏皆
列烽墩自承樂初北寇遠遁因移軍延綏棄河不守誠使兵強糧
足仍準祖制據守黃河萬全計也今河套未靖豈能遽復然亦宜
因時損益延綏將校視他鎮爲少調遣不足請增置參將二人統

軍九千使駐要地互相援接實今日急務奏上皆從之復在邊建
置多合機宜及還朝言者謂治兵非復所長特命白圭代之改復
工部謹守法度聲名逾兵部時中官請修皇城西北迴廊復議緩
其役中官領騰驤四衛軍者請給胼襪鞋袴復執不可曰朝廷制
此本給征行之士使得刻日戒途無勞縫紉京軍則歲給冬衣布
棉此成憲也奈何淪之十四年加太子太保復好古嗜學守廉約
與人無城府當官職歲大體居工部十二年會災異言官言其衰
老乞休不許居二月汪直諷言官更劾復乃傳旨竝令致仕歸久
之卒贈太子太保諡莊簡

明史
列傳

李儀涿州人

一統志

永樂間以薦舉授戶部主事宣宗既平高煦儀

請削趙王護衛帝不聽既而言者益眾帝封其詞遣使諭王如儀
捐王卽獻護衛趙卒無事儀尋出知九江府有惠政英宗卽位之

歲始設諸邊巡撫僉都御史丁瑋方督大同宣府軍儲而儀以右

僉都御史巡撫其地盛有所建置

明史列傳

軍民相安權貴皆爲斂避

涿州吳志

明年請以大同東西二路分責於總兵官羅文方政從之

列傳

阿台朵兒只伯屢寇甘涼邊將告急時朝讓將出大兵擊阿台

等儀言四裔爲患自古有之在備禦有方耳和甯殘部窮無所歸

乍臣乍叛小爲邊寇邊將謹待之將自遁何必窮兵不納大同督

糧參政劉璉不職儀劾之璉乃誣儀淫亂事會參將石亨欲奏鎮

守中官郭敬罪先吞儀儀誤封緘者牒於核饒主事文卷中戶部

以聞亨敬遂互相奏許詔儀璉自陳而切責敬等儀自負其直詞

頗激二月被劾下獄瘐死

明紀十三

儀居官廉謹邊人素德儀建昭德

祠以祀

明史列傳

李侃字希正東安人一統

志

曾祖士瞻元翰林學士承旨嘗使闕適

海酋據城王師攻之不下士瞻喻以禍福首遂出降閩人立祠祀之祖繼本登進士持身端潔樂育人才河朔學者多師事之著有

一山集時號一山先生

東安李志

佩正統七年進士授戶科給事中景

帝監國陳簡將才募民壯用戰車三事

明史列傳

也先逼紫荆關京師

戒嚴

明紀十四

議者欲焚城外馬草侃言敵輕剽無持久心乞勿焚免

復斂爲民累皆報許時父母在容城侃曉夜悲泣乞假冒險迎之

景泰初議錄扈從死事諸臣後侃因言避難偷生者宜嚴譴以勵

臣節上皇將還

明史列傳

禮部具迎奉儀上傳旨以一轎二馬迎於居

庸

明紀十五

侃與同官劉福等

明史列傳

言奉迎禮太薄帝報曰朕尊大兄

爲太上皇帝尊禮無加矣願云太薄其意何居

明紀十五

尚書胡濙爲

解乃已再遷都給事中單興滅天下學校師儒俸廩侃奏復之戶

部尚書金濂遠詔徵租

明史列傳

學士江淵以告帝詰責戶部金濂內

慚抵言無有侃等請詰天下有司違詔故濫恐事敗乃言銀布懸

帛詔書未載若概減免國用何資帝欲宥之侃與御史王允上殿

力爭遂下都察院獄明紀十五石亨從子彪侵民業侃請置重典并嚴

禁勦成中官不得豪奪細民有司隱者同罪帝宥亨彪餘如其請

廷議易儲明史列傳會議者九十一人明紀十五眾相顧莫敢發言通鑑輯覽一百

四侃泣言東宮無失德時議壯之擢詹事府丞天順元年改太常

丞進太僕卿明史列傳二年夏四月復設巡撫官遷侃撫山西明紀十七奏

言塞北之地與窮荒無異非生長其間者未有能甯居而狎敵者

也今南人戍西北邊怯風寒聞寇股栗而北人戍南亦不耐暑多

潛逃宜令南北清勾之軍各就本土補伍人情交便戎備得修時

不能用奏發巡按李傑罪傑亦許侃按傑事有驗除名侃無賊罪

獲宥六年考察屬吏奏罷布政使王允李正芳以下百六十人因

言諸臣年與臣若不堪任事者臣悉退之臣亦當罷詔不許侃性

剛方力振風紀貪墨者屏跡其年冬以母喪歸軍民擁泣至不得

行服除遂不出家居十餘年卒侃事親孝明史列傳母晚年喪明每退

朝必論說史傳以悅其心墓誌好學安貧歿幾不能殮二子德恢德

仁皆進士一統志德恢嚴州知府德仁河東鹽運使明史列傳

董方字仲矩通州漕縣人續唐志正統十年進士試政兵部旋

以父憂歸服闋通州高志授大理評事以蕭維楨薦還寺正唐志用法

平恕克雪冤抑有巨室被盜東阿民蔣傑與盜遇并報之訥弗能

辨不勝拷掠遂誣服周洪謨刑部尙書董公墓誌銘方訊實釋之通州高志錦衣旗軍

鐵堅與百戶薛海鬪傷腦奪銀簪官按白晝奪財傷人者死方謂

死起忿爭非造意攘奪從輕典金吾衛卒領大內官銅出道中竊

銅板尺餘覘卒執之有司擬以盜庫物律斬方謂物既領出非潛

入內庫盜者宜論監臨自盜

墓誌銘

得減死景泰間奉命往山西錄

囚太原民白政警殺王選投尸汾河事覺政誣選妻與己私同謀殺夫獄成方謂彼爲夫婦三十餘年生子十數人何至是盡拘鄰里證驗政具服選妻得釋羅禮妻被盜殺有司誣劉達夫婦害之俱應死方白其寃後知殺人者達壻也其餘活死罪可矜疑者若

千人

通州高志

事竣還朝建言十事皆允納天順丁丑陞右寺丞

墓誌銘

曹欽謀逆趣軍士救護賊平掘本寺右少卿

諫輔唐志

成化乙酉遷刑

部右侍郎丙戌持節詣楚藩行冊封禮癸巳秋進秩都察院右都御史巡撫大同大同久不雨

墓誌銘

方至祈雨輒應河南軍戍大同

者多僦民居方構營房若干眾論稱便載馬幣者以千數爲區畫買補逾月遂足以老乞休越六年卒年六十八贈太子少保諡襄毅方好學

通州高志

手不釋卷有詩文集寺丞劉翰爲編讞獄錄學士

劉定之序之以行

墓誌銘

子甯由進士官按察僉事

通州高志

岳正字季方灤縣人

一統志

別號蒙泉學者稱爲蒙泉先生

懷麓堂集十一

正統十一年會試第一

賜進士及第授編修進左贊善高自期許

氣屹屹不能下一人

明史列傳

嘗閉戶夜草疏請復恭讓后位號其伯

兄弟俯樓隙窺之驚曰奈老母何取其草裂之乃止

懷麓堂集

天順初

改修撰閣臣徐有貞李賢下獄帝旣用呂原預政頃之薛瑄又致

仕帝謀代者

明史列傳

尙書王弼以正薦帝亦素知正名召對文華殿

正長身美鬚髯帝遙見色喜旣登陛連稱善問年幾何家安在何

年進士正具以對復大喜曰爾年正強仕吾北人又朕所取士今

用爾內閣

通鑑輯覽一百五十一

正頓首受命趨出石亨張軼遇之左順門愕

然曰何自至此比入帝曰朕今日自擇一閣臣問爲誰帝曰岳正

兩人陽賀帝曰但官小耳當與吏部左侍郎兼學士兩人曰陛下

既得人俟稱職加秩未晚帝默然遂命正以原官入闕正素豪邁負氣敢言及爲帝所拔擢益感激思自效便殿論奏至唾濺帝衣有規以信而後諫者慨然日上顧我厚懼無以報稱子乃以諫官處我乎

明史
列傳

湯序嘗奏災異請盡去奸臣帝問正正言奸臣無指

名卽求之人人自危且序術淺何足信也有僧爲妖言錦衣校邏得之坐以謀反中官牛玉請官邏者正言事得實不過坐妖言律邏者給賞而已不宜與官僧黨數十人皆得免

明紀
十七

或爲匿名書

列曹吉祥罪狀吉祥怒請出榜購之帝令撰榜格正與呂原入見曰爲政有體盜賊責兵部奸宄責法司豈有天子自出榜購募者且事緩之則自露急之則愈匿帝是其言遂不究石彪鎮大同遣使獻捷下內閣問狀使者言捕斬無算不能悉致皆梟林木間正按地圖詰之曰此地皆沙漠汝梟何所其人語塞時亨吉祥恣甚

正言於帝二人權太重恐久不可制請以計開之帝曰卽可以朕
意告二人通鑑輯覽正出見吉祥曰忠國公常令杜清來此何爲

者吉祥曰辱石公愛致誠款耳正曰不然彼使伺公所爲耳因勸

吉祥辭兵柄復請亨諭令自戢明史列傳且云上使我告公如此二人

揣知上意因詣帝前免冠請死帝內愧慰諭之而責正漏言正對

曰臣觀二家必以謀叛滅臣欲全上恩故令早自爲計耳二人聞

益怒通鑑輯覽會承天門災正極言亨將爲不軌且言陳汝言盧

彬小人狀時徐有貞再下獄復云用有貞則天變可弭帝皆不納

命正草責躬詔通志正草赦曰乃者承天門災朕心震驚罔知所

措意敬天事神有未盡歟祖宗成憲有不遵歟善惡不分用舍乖

欺曲直不辨刑獄冤歟征調多方軍旅勞歟賞賚無度府庫虛歟

請謁不息官胥濫歟賄賂公行政事廢歟朋奸欺罔附權勢歟羣

吏弄法擅威福歟征斂徭役太重而閭閻靡甯歟讒誑奔競之徒
倖進而忠言正士不用歟抑有司闡葺酷暴貪冒無厭而致軍民
不得其所歟此皆傷和致災之由而朕有所未明也今朕省愆思
咎休惕是存爾羣臣休戚惟均其洗心改過無蹈前非當行者直
言無隱敕下舉朝傳誦明史列傳曹石相謂言姦邪蒙蔽不謂我曹抑
不謂徐有貞乎請於上野記謂正賈直謗訕帝怒仍授內侍書明

日謫欽州同知

明史列傳

既行道邛以母老留家月餘復爲尙書陳汝

言所劾逮繫詔獄

通鑑輯覽

杖百戍肅州至涿州夜宿傳舍手梏

急氣奔且死涿人楊四者頗尙意氣爲所哀解人其人怒不肯楊

醉以醇酒何其酣睡謂正曰梏有封印奈何正曰可燒鑿令熱以

酒將紙就炙之紙得酒皆昂起因去釘脫梏剝其中復釘封之其

人覺有異楊說之曰業已然矣今奉銀數十兩不如納之懷麓堂集乃

得至成所明史列傳時太監猛虎石鎮甘肅傳有密諭須生不須死鎮

巡而下亦雅重之致客禮焉懷麓堂集英宗亦悉其忠嘗念之曰岳正

倒好只是大膽正聞自為像贊述帝前語末言臣嘗聞古人之言

蓋將之死而靡憾也明史列傳越四五年曹石俱以不軌敗懷麓堂集帝謂

李賢曰岳正固嘗言之賢曰正有老母得放歸田里幸甚乃釋為

民憲宗立以原官直經筵纂修英宗實錄初正得罪明史列傳室廬財

產盡賜指揮季鐸鐸得旨自往據岳門檢括淨盡家人出門一一

搜驗奇辱特甚岳遂適鐸得罪上曰季鐸家產盡是岳正物可悉

取還之岳乃亦往據鐸門搜括如鐸岳為儒臣貴無幾何鐸素積

不貲皆歸於岳野記尋被譖續輔唐志又以忤大學士李賢出為

興化府知府至官築隄溉田數千頃節縮浮費經理預備倉欲有

所興革鄉士大夫不利其所為騰謗言正亦厭吏職五年入覲遂

彙任又五年卒年五十五正博學能文章

明史列傳

於書無所不讀其

爲文高簡峻拔追古作者詩亦雅健脫俗字法精邃大書尤偉旁

及雕繪鐫刻悉臻其妙晚好皇極書

懷麓堂集

所著有類博稿十卷嘉

靖中追贈太常寺卿謚文肅

明史列傳

建祠祀之

通州高志

邢表字居正文安人

隸輔唐志七十四

博通經史尤精理學嘗曰中庸一

書聖賢關鍵唯我能尋著景泰丁丑成進士

彭韶邢拙庵傳

授獲嘉縣知

縣治行最擢彰德知府

畿輔唐志

適衡水民王澤爲校尉馬成誘至安

陽殺澤竊其妻以逃澤挺身赴愬於表捕之不得具疏城隍數日成

携其竊婦出首人咸以爲神

彭傳

因疏論趙藩驛橫調知衛輝並有

善政

畿輔唐志

時久旱瘟疫大行醮以禳之俄頃雨大如注次年水災

奏免六郡稅糧陞山東左參政轉右布政使調四川左布政使

彭傳

歲災大發廩賑貸全活無算茶課逋者三百餘萬斤表請每斤徵

銀一分充松潘餉從之

續志

晉都察院右副都御史巡撫四川上

言川事之壞土司驕縱淫佚苗情難束以漢法而貪帥好激變以邀功名以故竊發易創也率縱之使橫卽大創亦易舉也率弛之使蔓蓋不蔓無以糜大官之錢不橫無以爲封拜之地此西南諸蠻所以易戢而難靖者自昔皆然表請簡壯勇正首惡安反側置戍建堡使蠶叢鳥道之鄉悉遵道遵路而不敢依林菁爲伏戎之莽恃巖巖爲升高之陵又思大荒之後繼以大兵民艱乃食亂是用長非屯田無以計久遠但屯法之不行皆緣歲有豐歉租惟一制請與軍民約課耕不課稅俾沿邊閑地聽其儘力開墾粟旣充則價自賤以銀易粟邊儲庶不憂匱乏奏可凡兩年得羨糧數萬石撫蜀四年建昌之役戎服臨陣者八越月致疽發於背卒家無餘資軍民號泣爲之罷市賜諭祭葬祀四川名宦

彭傳

李賓字廷用順義人正統進士授浙江道御史已已邊警募兵萬

餘軍威遠震虜遁去陞副都御史提督永平山海諸軍興屯田之

利兵民交賴英廟復辟召爲大理卿時刑獄嚴刻賓疏古失刑數

事直言不諱朝論避之辛巳秋曹欽謀不軌幾輔唐志七十一攻東西長

安門縱火明紀十七賓率家人擊之撲滅長安門火幾輔唐志天順八年官

左都御史剛簡鎮默以伉直著名指揮僉事門達綱目三編十二知東宮

局丞王綸必柄用預爲結納無何憲宗嗣位綸敗達坐調貴州都

勻衛帶俸差操甫行言官交章論其罪明史門達傳賓疏言達恃恩藐

法玩弄威權文網苛細大獄屢興假託上旨恣逞貪殘官校驛駁

子弟奸比罪浮於謫謾當正國法於是逮繫坐斬籍其家達廷訊

時負固強辨至賓前曰公宜訊我遂引服綱目三編十二歷陞南京兵部

尙書令有司設常平倉平江洋鹽盜幾輔唐志南畿仍歲大饑賓請令

南畿浙江江西福建諸生及官員軍民子孫納粟送監姚夔言太
學乃育才之地近者直省起送四十歲生員及納草納馬者動以

萬計不勝其濫且使天下以貨爲賢士風日陋請罷其議報可明紀

十賓乞歸不從進太子少保卒畿輔唐志諡襄敏萬曆沈志

芮釗字宗遠寶坻人畿輔唐志七十四正統進士由御史厯江西副使遷

陝西布政使所在皆有政聲寶坻洪志以右副都御史巡撫甘肅訓練

卒伍謹斥埃廣蓄積鎮守三年邊鎮宴然畿輔唐志會母喪朝廷重邊

計特遣官營葬詔還鎮時寇入涼州莊浪諸處釗分兵進剿所向

克捷寇出沒幾一載而城守無虞居民不致流散者釗之力也既

勞於王事又痛不得終喪竟卒于官寶坻洪志貧不能殮人服其清操

云畿輔唐志

劉聰字守愚蘄州衛人畿輔唐志七十四有友人毛欽病革以後事託聰

聰爲之舉二喪婚嫁其子女凡故舊告急無不周之官兵科給事中時稱兵科爲錢窖聰獨持風力請託不行上章勸孝宗早視朝以勤政事止傳奉以却奔競皆嘉納之陞朔廣參政承勘南渭王長子獄論死者五人聰廉其誣悉釋之竟抵王長子罪遷山東布政使

薊州沈志

擢右副都御史巡撫宣府

續志

留心邊務境內肅清既

而致政歸歿於家祀鄉賢祠

薊州沈志

施聚其先沙漠人居順天通州

一統志

父忠爲金吾衛指揮使從成

祖北征陣亡聚嗣職

通州高志

以勇敢稱

明史巫凱傳

從北征至得勝口擒

可可帖木兒

一統志

累擢都指揮同知宣德中備寇遼東以曹義薦

進都指揮使

通州高志

義與兀良哈戰聚皆從之也先逼京師景帝詔

聚與焦禮俱入衛聚慟哭卽日引兵西部下進牛酒聚揮之曰天

子安在吾屬何心喪此

明史巫凱傳

比至寇已退乃還歷官至左都督

通州高志

充右副總兵

一統志

天順元年封懷柔伯食祿千一百石明年

以守邊久與世券聚智勇橫直與士卒同甘苦在遼東訓練有法

增繕障塞興修儒教軍民悅服卒謚威靖四傳至瑾吏部言不當

複製世宗特許之

通州高志

傳爵至明亡

明史巫

金純字文明平谷人景泰進士

七十四

續唐志

除南京刑部主事陞郎

中純性方正不濫交游發伏摘奸人皆服其明允成化己丑授四

川順慶知府未赴丁父憂服闋補廣西桂林知府

平谷朱志

桂巖獨賊

劫掠鄰境御史檄純招之純遣謀語賊曰太守親來招撫以蘇眾

命孺皆痛哭引領聽撫

續唐志

明日具招牌親詣巖口谿既皆魚貫

而下老幼約三千餘人純悉遣散之事平御史欲奏其功純以地

方無虞爲幸多矣何敢邀功御史卒以純招撫羣賊平定地方及

治郡十事以聞上賜誥命一通進階中憲大夫未幾丁內艱服闋

再守江西廣信府會永豐銀坑賊起隨令近鄉兵民及大姓有力者捕之賊遂散避陞山西參政時河東旱荒邊儲告乏純設法搬運足備軍用轉本司布政使致仕卒年八十八

平谷朱志

朱驥字尙德大興人初襲衛千戶淹蹇不爲人知尙書于謙以女妻之坐謫戍還官成化時掌衛事二十餘年委任獨至驥爲人小心慎密不逞糾緝未嘗妄興一事凡涉誣誤者輒縱舍有所論列悉推諸官校以故從之蒞事者多至顯官時人莫不賢驥而歎于謙爲知人云

續唐志七十四

紀常字元正號西臯其先山東人徙居文安常生五六歲未能言八歲讀書十三解行文有驚人語邑儒馬大章奇之因締姻好大章貧且卒或謂令改盟父試問之則泣而不諾父喜曰黃童能知大義他日必不在人下成進士授戶部主事晉刑部員外郎習法

明允僚友稱爲老法司凡大獄涉疑滯者皆就質之出補陝西僉事陝西有三缺人皆難隴右常毅然不避隴右近邊塞山谷險峻爲盜藪常摘伏如神指授方略不三月盡擒之改徙漢中漢中守性驍褊好庇其下常至守正執法電囑風行一如振落課績第一陞湖廣按察使臬司帶贖淹囚最多常勵精裁決月餘而囹圄空丁母艱服闋補官四川囊橐如洗僕質皆貸之親友陞河南右布政司尋轉左以疾引休歸嘗自言爲秀才未嘗言財貨以至厯官此心可質天地又嘗手錄長史家訓告戒次子誠曰人家興替不在富貴貧賤使貴爲公卿富比崇愷而不知禮義不可謂興若簞食瓢飲肘見纓絕而禮義相先不可謂替卒年八十七子誠履訥紀西華傳誠字勉夫生有異稟常指之曰是兒當亢吾宗者戊午鄉試常遴疾誠侍不欲往常曰我望汝爲忠爲孝豈在區區奉湯藥乎強之

行遂舉於鄉明年成進士授南京行人司初以遠親爲念常復遣之書曰汝委贖爲臣何分南北我尙未老勿貳爾心尋遷工部虞衡司郎中分署遵化督鐵冶人多視爲閒局率無所事事誠熟察弊端至則條議九事廣召佃清山場定冊籍罷窰稅止發配復本色減工料修厥城革冗食皆切時務次第行之及閱射於講武亭見亭後有堂可令諸生肄業遂闢湧泉書院扁其堂曰講易諸生進而質曰公以易語諸生諸生又皆學易名固宜爾後進或有別業其繼公而至者亦未必皆治易也奈何誠曰易五經之原而文字之祖也書得易之情禮得易之序樂得易之和春秋得易之斷語易而五經該之矣孔子假年學易可無大過易之道其可遠哉因書爲記嗣陞懷慶府知府擢井陘兵備副使令民什伍相保互相糾察民無爲盜卽盜至亦無所容境內肅然澤沔故道自深州

饒陽達獻青二縣入海自饒陽既墜之後每一水至民多魚鼈誠謂必欲除永遠之害莫如復故道必欲舉疏濬之利莫如排羣疑竟阻於眾咻事未及行病作疏歸三載卒

丁士美紀
文泉傳

劉志字景仁順天人性謹樸言若不能出口每論禮必以朱子家禮爲的爲某國公府教書訓導某欲遷其嫡母之墓而以生母配葬講具奏草志禮折之某強焉志曰以若所爲非獨禮悖且不免於法某乃賂他訓導錢賍者草疏以進英廟震怒究爲謀者柳暄於市人皆服志之有識又嘗勸人毀銅佛以鑄器不肯強之乃從後志年未五十得奇癘被面以死人指以爲毀佛之報嗟乎今天下如志者尙可得哉

李東陽鄱城故老傳

趙某順天人本楊姓鬻醬爲業人呼爲醬楊天順初迎鑿之役武官胥士乘勢納賂以冒官賞至累千數百人或以語某某搗手謝

曰我粗人無食肉相財帛非所惜恐反蹈禍機耳不越歲冒官者
事敗盡革職或遭貶竄人始曰趙某不若也某尤好意氣其女夫
刑部主事朱鐸貧而有守每遺錢穀以助其廉朱病卒子又死某
育其女俾不失節

李東陽都
城故老傳

駱貴字秉彝順天人粗涉經籍少爲童師性伉直不匿人過母喪
引儻家禮去旛幢鼓樂用人爲方相市兒爭譁笑之尤不喜神怪
嘗有降神者人各獻香楮貴脫所躐雙屐置案上曰吾無他聊以
供神觀者縮頸貴大笑而去後以壽終

李東陽都
城故老傳

李東陽字賓之號西涯

李文正公
祠碑記

茶陵州人以成籍居京師

明史
列傳

父滔爲武清渡子有叟來言汝有善念當爲擇瘞親地指一山曰
有白狐卧處是李夕往見卧白狐因折樹枝有聲狐驚聳身三立
去卽其穴瘞明日叟來曰俟狐自起爾今驚去當中衰然汝子三

公矣果生東陽

祠碑記

四歲能大書

吾學編三十

舉奇童景帝召見

名臣記三

十雙履二寸許紵繫之一粗紵小衫著以見帝

祠碑記

命書麟鳳龜

龍十餘字上大喜

大典張志

抱置膝上賜果鈔八歲兩召講尚書大義

帝京景物略四

稱旨命入京學天順八年年十八成進士選庶吉士授編

修累遷侍講學士充東宮講官宏治五年憲宗實錄成由左庶子

兼侍講學士進太常少卿兼官如故五年旱災求言東陽條摘孟

子七篇大義附以時政得失累數千言上之帝稱善下所司議處

東陽甚負文名大學士徐溥等以誥敕繁請如先朝王直故事設

官專領乃擢東陽爲禮部侍郎兼翰林學士典誥敕

通鑑輯覽八

年以本官直文淵閣參預機務

明史本傳

冬十月占城奏安南侵撓帝

欲遣大臣往解

明紀十二

東陽曰春秋王者不治夷狄安南雖奉正

朔修職貢然恃險負固積歲已久今遣官至其國徒掉寸舌小必

掩過飾非大或執迷抗命若置而不問損威已多卽問罪興師貽

患尤大宜勿聽

吾學編

中官李廣煉藥被寵東陽疏引唐柳泌宋郭

京爲鑿

祠碑記

科道疏救武岡知州劉遜上震怒俱下獄又同疏申

救得釋尋召至平臺奏事

吾學編

十一年皇太子出關就學

明紀二

進太子少保禮部尚書兼文淵閣大學士

明史本傳

召見面議四營總

兵官去留是年清甯宮災東陽與同官上疏曰

吾學編

古帝王未有

不遇災而懼者向來奸邪災戒聖聽賄賂公行賞罰失當災異之

積正此之由

明紀二

有爲李廣乞祠額者東陽執言不可

祠碑清記

甯宮成召能仁寺僧入大內慶讚又執不可上皆從之十二年給

事中華利劾程敏政考會試通私命東陽覆試十六年加太子太

保戶部尚書謹身殿大學士

吾學編

十七年闕里先師廟成遣東陽

祭告

明紀二

還上時政疏

吾學編

帝嘉歎悉付所司

明紀二

是時帝

數召問臣面議政事東陽與首輔劉健等竭心獻納時政闕失必

盡言極諫

明史本傳

時人爲之語曰李公謀劉公斷謝公尤侃侃

明史謝遷

傳

十八年上不豫召入受顧命

吾學編

武宗立屢加少傅兼太子太

傅

明史本傳

正德元年上不親政屢與同官上疏皆不報又陳政令十

失是冬加少師太子少師吏部尙書華蓋殿大學士二年逆瑾擅

權益恣暴

吾學編

無所不訕侮於東陽猶陽禮敬凡瑾所爲亂政東

陽彌縫其間亦多所補救

明史列傳

尙寶卿崔璿御史姚祥主事張偉

爲

吾學編

給事中安奎御史張彧以覈邊餉失瑾意皆荷

重校幾死東陽力救璿等謫戍奎或釋爲民

明史列傳

四川鎮守太監

羅籥以旣革巡撫請得便宜行事瑾主之力東陽謂兵馬錢糧祖

制無歸一人者執言不可

祠碑記

三年有遺匿名書於御道數瑾罪

者詔百官悉跪奉天門外頃之執庶僚三百餘人下詔獄次日東

陽等力救會瑾亦廉知其同類所爲眾獲有

明史列傳凡朝官忤瑾者

悉誣以舊事罰米輸邊

通鑑輯覽一百七

多至千五百石東陽委曲開導

瑾不從乃移原籍倉中交納

大興張志

瑾患盜賊日滋欲戍其家屬及

爲之囊橐者

明史列傳

或自陳獲盜七十人所以新例從事東陽解

之乃免

明紀二

劉健謝遷劉大夏楊一清及平江伯陳熊輩幾得

危禍皆賴東陽而解

明史列傳

五年三月甲子大風霾天色晦冥者數

日辛未禱雨釋囚免

正德三年逋賦東陽等因上詔書所未及者

數條帝悉從之

明紀二

會張永發瑾奸伏誅上以東陽有反正功

加特進左柱國廢其從子兆蕃爲尙寶丞

吾學編

東陽乞休辭廢不

許時政事一新而張永魏彬馬永成谷大用猶用事帝嬉遊如故

皇子未生多居宿於外又議大興豹房之役建寺觀禁中東陽前

後上章切諫不報

明紀二

七年東陽等以京師及山西陝西雲南

福建相繼地震而帝講筵不舉視朝久曠宗廟祭享不親禁門出入無度谷大用仍開西廡屢上疏極諫帝亦終不聽九載秩滿兼支大學士俸河南賊平廕子世錦衣千戶再疏力辭改廕六品文

官

明史列傳

一日朝退沈思休致袍帶未及解有道士服紫玉環來見

指東陽所服帶并自指曰何如我環其能棄却入山東陽日久服無味入山須之歲月耳道士笑出庭中微吟踏劍飛去

祠碑記

遂乞

休前後章數上至是如許賜敕給廩隸如故事又四年卒年七十贈大師諡文正東陽有孝行初官翰林時嘗飲酒至夜深父不就寢忍寒待其歸自此終身不夜飲於外工篆隸書碑版篇翰流播四裔士大夫出其門者悉粲然有所成就初與劉健謝遷請誅瑾及健遷去而東陽獨留氣節之士多非之侍郎羅圮上書勸其早退至請削門生籍然立朝五十年清節不渝既罷政家居請詩友

書篆者填塞戶限頗資以給朝夕一日夫人方進紙墨東陽有倦色夫人笑曰今日設客可使案無魚菜耶乃欣然命筆移時而罷其風操如此明史列傳子兆先天世蔭皆姪歿甫百年而中衰如叟言

祠碑

陳壯字直夫

畿輔唐志七十四

其先浙江山陰人祖坐事謫成交阯後調

京衛遂家焉舉天順八年進士授南京御史明史列傳帝將以元夕張

燈命詞臣撰詩進奉明紀十八編修章懋等建言得罪壯抗疏救之帝

遣中官採花木復疏諫尙書陳翌請以馬豆代百官俸壯言飼馬

之物不可養士大夫事乃寢壯家素饒常祿外一無所取明史列傳讀

書務實踐父歿

畿輔唐志

廬墓側居喪一循古禮明史列傳母憂亦然畿輔唐志

歷江西僉事致仕家居十餘年宏治中以尙書張悅薦起官福建居二年又乞致仕時倪岳爲吏部素賢之擢河南副使歲荒賑饑

民懷其惠僉都御史林俊謝病舉以自代未及遷而壯又乞致仕

巡撫孫需奏留之又二年竟致仕去

明史列傳

楊垣字景和京師人

日下舊聞考引東海集

天順間錦衣衛都指揮門達怙

寵驕橫袁彬不為達下達深銜之誣以罪

明史門達傳

垣素不識彬而

爲之上疏曰正統十四年車駕北狩從臣奔散逃生惟袁彬一人

特校尉之役乃能保護聖躬備嘗艱苦及駕還復辟授職酬勞公

論稱當今者無人奏劾卒然付獄拷掠備至罪定而後付律法司

雖知其枉不敢辨明陷彬於死雖止一夫但傷公論人不自安乞

以彬等御前審錄庶得明白擊登聞鼓以進

東海集

詔并下達治時

大學士李賢方被寵任數陳達罪達恨次骨欲并去之

通鑑輯覽一百五

遂拷掠垣教以引賢垣卽諺曰此李學士導我也達大喜立奏聞

請法司會鞠垣午門外帝遣中官裴當監視達欲執賢并訊當日

大臣不可辱乃止及訊塤曰吾小人何由見李學士此門錦衣教

我達色沮不能言

明紀十七

彬亦慝數達納賄狀法司畏達不敢聞坐

彬絞輸贖塤斬帝命彬贖畢調南京錦衣而禁錮塤

明史門

未幾

英宗升遐言者劾達罪舉塤事爲證達遂得罪塤父爲漆工宣德

間膏造人至倭國傳泥金畫漆之法以歸塤遂習之而自出己意

以五色金鈿並施天真爛然倭人見之亦齟指稱歎以爲不可及

成化初修英宗實錄稱爲義士云

東海集

田景賢字宗儒涿州人

畿輔唐志七十一

舉成化甲午鄉試乙未進士爲

戶科給事中

羅洪先禮部尚書田公神道碑銘

劾貴戚慶雲伯周壽

畿輔唐志

忤憲宗

旨廷杖瀕死

神道碑銘

猶極言不已尋擢通政參議

涿州續志

覈實宣府諸

邊儲積立法畫一以便出納視居庸三關歸備禦之策以佐朝議

神道碑銘建白咸切時宜

畿輔唐志

代祀東方凡道途所經耳目覘記可駭

異者具以上聞蓋雖不在言路無由盡論天下事然猶隨事納忠

以冀一言之用

神道碑銘

歷官禮部尙書掌太常事劉瑾擅政

畿輔志

奴

視諸大臣俱入賄求免然貽入禍亦不免太常典諸儀禮郊祀燕

享朝賀樂舞節目繁碎最易得罪

神道碑銘

景賢長身玉立簡靜自持

毫不爲屈

涿州續志

終瑾之身竟不能有所整毒

神道碑銘

後進太子太保

卒贈太子太傅

涿州續志

孫汝麟登嘉靖庚戌進士官戶部主事

神道碑銘

歐信字孚先蘄州人

一統志

成化進士任戶部主事奉命賑陝活飢

民以萬計

畿輔志

署郎中事時權貴有請河東鹽十萬引眾不

敢出一語信獨持不可督餉大同增置東大有倉乘賤而糴不數

歲贏五十餘萬石劉大夏巡撫至歎曰典邊儲者盡如歐郎中吾

無此行矣中官樊德趙宣上言保定河間有隙地可作皇莊信往

看力白其妄乃止陞浙江參政歷河南山東布政使俱有賢聲

蘄州

志沈正德初累擢右副都御史巡撫大同訓兵練武綜覈屯政一統志

備舉廢墜以才能稱唐志未踰年以勞瘁卒沈志

燕忠字良臣薊州衛人成化進士任甯國府推官讞獄多所平反

繼補唐志有民買於江淮間怨家嗾其僕殺之因盜其貨罪人久

不得忠廉得其情誅之沈志宏治中歷御史一統志以災異上言親

賢納諫重名器節財費嚴賞賚薊州志近尤官日眾土木日興莊田

賜撥日廣奔競無恥之徒充列庶位一統志言甚剴切孝宗嘉納之

巡按陝西發奸摘伏風聲凜凜賊吏望風解組陞環慶兵備副使

薊州志會都御史楊一清修舉馬政以忠爲苑馬卿正德初就遷陝

西按察使一統志禁和買節妄費民間有冰玉之譏進布政使以簡

靜爲治陝人逆璫劉瑾方柄國忠獨不拜其墓且無所餽瑾啣之

卒不能害巡撫宣府改大理寺卿執法秉公辨知州田崑之寃正

胡某殺父之獄皆逆鱗忤權貴人爲忠危而竟從忠之議江西藩

臬交惡獄久不決蓋因宸濠主之也忠奉命往按獄成人無異言

蘇州沈志性峭直不輕交際貴近請託必正色拒之魏志有包孝肅趙

清獻之風居官三十年卒之日囊無餘蓄蘇州沈志所司奏忠剛正得

大臣體特贈刑部尙書一統志宏治壬戌進士選翰林院庶

吉士正德初授兵科給事中轉左給事中平谷朱志劉瑾擅政魏志毒

害正人兵部尙書劉大夏一時領袖瑾尤嫉之平谷朱志先是大夏言

鎮守中官如江西董讓薊州劉瑯陝西劉雲山東朱雲貪殘尤甚

乞按治帝不悅大夏以言不見用數上章乞骸骨詔加太子太保

賜敕馳驛歸禴請留之不報明紀二太監段聰以侍東宮頗得寵

倖遂欲借逆瑾之力負緣乞官其姪禴上疏力諍之改監察御史

平谷朱志查盤山東墨吏望風解綬一統志陞大理寺卿進左少卿平谷朱志

知縣劉儒受賊爲僉事呂和所按儒賂中官欲反罪和禡執不可

竟正儒罪後巡撫山西鎮守太監吳經貪橫虐民禡置其黨於法

勢始敗武宗西巡禡極諫上怒執禡左右拷訊竟無所得乃止統志

嘉靖壬午卒於官軍民感禡之德立祠以祀其子扶視歸家惟

圖書數卷而已弟禡平谷朱志自有傳

王鏜字彥升平谷人宏治進士任山東德平知縣政平訟理擢御

史剛毅不畏強豪巡通倉宿弊一清又奏請添修通州新城以保

倉儲七十四按蜀適廖麻子喻老人倡亂鏜與總制彭澤竭力

剿除其亂乃平平谷朱志武宗賜璽書褒之累遷河南副使以憂歸遂

不出平谷朱志年七十八終于家平谷朱志周榮字國信通州人宏治十四

年進士知徐州蕭縣有僧欲強姦民婦婦不從僧殺之時其夫他

往婦家誣夫弟甚堅稜疑爲冤獄未定夢婦白死狀甚悉乃託齋
諸寺僧而殺人之僧亦至尙治之一訊卽服遂釋其弟邑人稱爲

神明祀鄉賢

通州高志

邢昭字仲明三河人

一統志

謹之子宏治丙辰進士授洪洞縣尹擢

浙江道監察御史

三河志

按鹽浙江守正不阿因忤劉瑾廷杖一百

不死人稱鐵鑄邢昭

七十一

謫高平知縣瑾誅復山西道監察

御史終汝甯府知府

一統志

張翰號西野宛平人宏治中由進士選

御史彈劾不避權貴時劉瑾富國內外重足而立翰獨長揖不爲

屈瑾不能堪拳擊翰翰躍起擊瑾仆地人或危之翰曰恨未殺此

奴爲國家除禍根耳無何瑾敗歷官副都御史巡撫四川

宛平志

蕭選字廷舉三河人宏治己未進士爲監厓令摘發幽伏人以包孝

肅目之爲立生祠

三河志

亦因忤瑾左遷揚州衛經歷擢知獲嘉拜

山西道監察御史巡鹽河東國計充裕累遷僉都御史

畿輔唐志

賈斌蘄州貢生爲鴻臚寺鳴贊爲人小心勤慎動無所苟宏治年

視朝忽大雨群臣皆失次斌肅容鵠立孝宗器之陞禮部左侍郎

進尙書正德改元致仕歸處鄉黨如布衣時有公事詣有司惟乘

馬側行年八十有五助之與夫終不受

蘄州沈志

張欽字敬之通州右衛人世襲武清衛百戶

通州高志

本姓李張其母

姓也

舊聞考一百五十四此互異又云通鑑後復姓

案通州志云因祖鬻張氏從其姓與所書仍爲張欽蓋當時張侍郎之名李欽考史亦有復姓之女而

播傳遠近史亦從世所稱者書之

事父母孝有不悅長跪請至

解乃已正德六年進士由行人授御史巡視居庸關十二年帝聽

江彬言將出關幸宣府欽上疏諫曰臣聞明主不惡切直之言以

納忠烈士不憚死亡之誅以極諫比者人言紛紛謂車駕欲度居

庸遠遊邊塞臣度陛下非漫遊蓋欲親征北寇也不知北寇猖獗

但可遣將徂征豈宜輕勞萬乘英宗不聽大臣言六師遠駕遂成
己己之變且匹夫猶不自輕陛下奈何以宗廟社稷之身蹈不測
之險今內無親王監國又無太子臨朝外之甘肅有土番之患江
石有輦賊之擾淮南有漕運之艱巴蜀有採辦之困京畿諸郡夏
麥少收秋潦爲沴而陛下不虞禍變欲縱轡長驅觀兵絕塞臣竊
危之已聞朝臣切諫皆不納復疏言明史列傳上有卿輔之臣下至耳

目之官皆不避誅死苦諫陛下未蒙俞旨臣愚以爲不可出者有

三人心動搖供億繁苦一不可也遠涉險阻兩宮挂慮二不可也

塞俗強梁輕身挺出往與之角三不可也臣奉職巡關分當效死

卽加斧鉞之誅亦不敢避

張侍御開關
三疏圖記

疏入不報

明史

列傳至八月朔

忽報駕至昌平卽欲過關是日欽令分守指揮孫璽閉關南門太

監李嵩欲赴昌平候駕欽止之曰今日之事有死而已可擅離職

守乎俄千戶閭岳至南門傳旨欽捧璽書并監察御史印至門固守收其扇鑰手自持之誓曰有奪關者御史當手刃之

名臣應夜
謹錄

草疏曰臣聞天子將有親征之事必先期下詔廷臣集議其行也六軍翼衛百官扈從而後有車馬之音羽毛之美今寂然一不聞輒云車駕即日過關此必有假陛下名出邊勾賊者臣請捕其人

明正典刑若陛下果欲出關必兩宮用寶臣乃敢開不然萬死不奉詔已酉使者復來欽拔劍叱之曰此詐也使者懼而返為帝言

張御史幾殺臣帝大怒顧左右為我趣捕殺御史

明紀二
十六

會廷臣

亦多諫者帝不得已而還京師盛傳張御史閉關三疏云

通鑑輯
覽一百

七又二十餘日欽巡白羊口帝微服自德勝門出夜宿羊房民舍

遂疾馳出關數問御史安在欽聞追之已不及感憤西望慟哭明年帝還自宣府還至關笑曰前御史阻我我今已歸矣世宗嗣位

出爲漢中知府累官太僕卿

明史列傳

總制楊一清疏薦擢延綏兵備

副使欽請給關防置簿籍釐剔衛所積弊鳳翔有地曰胡店山險

多巨盜欽請於巡撫劉允悉擒滅固原迤北地平衍敵易闌入欽

受總制檄東自環縣西抵蘭州幾千里內多立塹壘不三月告成

邊地賴之嘉靖十七年欽以右副都御史巡撫四川每歲徵收糧

額一人多至千石難辦易侵欽令郡縣多簽收戶每戶無過百石

數少易完上下稱便請城壘增戍於漳臘以禦西北築隄防以捍

嘉定水患嘉定人立石頌其德

通州高志

歷官工部侍郎卒年六十六

欽性剛正不俯仰時俗歷仕三十年家無儲積曲周王尙一鶚序

三疏刊行稱其無尺寸之業貽子孫清德尤不易及也

舊聞考一百五十四

楊秦字濟之

良鄉志良鄉人一統

生而英敏端慤不妄笑語爲兒時

父問之曰女志何如曰我欲爲御史父奇之遣就學讀書卽曉大

義長爲弟子員弟子員皆弗若也正德庚午領順天鄉薦丁丑登

進士第已卯除行人司行人

王用貧楊公墓志銘

武宗南巡

良鄉楊志

秦率同列

抗疏諫

墓志銘

廷杖謫國子監學正嘉靖元年復任行人授福建道

監察御史

良鄉楊志

正色直言彈劾弗少避其奉勅陝西清戎也

墓志銘

查盤軍器照刷文卷清審刑獄

良鄉楊志

民用大悅先是抽丁補伍輒

復散亡秦曰是貧所致耳迺察其殷富者使厚遺之貪吏冒逃卒

以私餉者歲逾數千石秦稽諸邊得其情俾悉償焉

墓志銘

因奏建

局除戎器又疏請惜人才以隆治化

良鄉楊志

時少師楊石琮總制邊

務一旦過陝講武病其器敝秦令悉易之石琮嘉之曰我軍固有

恃哉

墓志銘

三年復命

良鄉楊志

擬四道事有囚當死託鄉人以千金賂

之秦叱之曰我知其法耳不知其賄自是疏之

墓志銘

議廟制劾禮

官依違不決出爲四川按察司僉事平寇有功賜金綺

畿輔唐志七十四

蜀大饑廷議命藩臬二人賑濟皆曰非楊僉事不可乃周歷郡縣

區處咸宜凡數月力憊而疾殆竟卒年四十八子守正守公墓志銘

守公性孝友嘉靖三十一年應試薦時兄守正爲副守公白學院

阮鶚讓兄應薦守正固辭守公固讓誠懇甚切阮爲之動容檄邑

旌其閭曰孝友之門良鄉楊志

顧銳字叔養涿州人畿輔唐志七十九性閑靜嘗步屨城外見西溪中羣

鷗上下欣喙自得與已意合因自號鷗汀涿州吳志幼聰慧日誦數千

言正德六年進士以詩名都下畿輔唐志當時稱涿郡有才一石銳得

其八斗四庫全書提要一百七十六選高滄知縣遷代王府長史去官歸築室

於城之西懷玉山自號懷玉山人著書歌詩畿輔唐志其五言古詩氣

韻清拔頗爲入格七言古詩跌宕自喜近體專尙音節四庫全書提要

所著有鷗汀集漁嘯集涿鹿先賢傳畿輔唐志

安撫宛平人正德十六年進士刑部主事

明史列傳

嘉靖三年帝欲考

獻帝改孝宗爲伯考

明史張中羽傳

召見羣臣左順門示以手敕言章聖

皇太后命去本生字羣臣駭愕而張璉桂萼復列上禮官欺罔十

三事且斥爲朋黨於是九卿詹事翰林給事御史六部大理行人

諸司各上章爭之皆留中不下尙書金獻民少卿徐文華倡言曰

諸疏留中必改稱孝宗爲伯考矣吏部右侍郎何孟春曰憲宗朝

議慈懿太后葬禮姚夔率百官伏哭文華門此我朝故事也

通鑑輯覽

一百

其年七月偕廷臣伏左順門哭諫帝大怒繫之詔獄杖三十

踰旬再杖之璽與同官王思王相給事中張原毛玉裴紹宗御史

張日鞞胡瓊郎中楊淮胡璉員外郎申良張燦主事仵瑜臧應奎

余禎殷承敘司務李可登凡十有七人皆病創先後卒

明史王穆思傳

宗嗣位贈璽光祿少卿

明史列傳

王誥字承恩保定人官安慶懷甯知縣居官廉介值宸濠不軌誓以死守捍禦二十餘日賊潰城完上錫敕書旌其忠義懷甯人爲立去思碑轉應天治中值江南北大祲病疫粥藥賑活數萬人子顯忠年十九成進士官戶科給事中首疏訓儲貳恤邊士咸蒙嘉納又彈本兵與總督大臣藥藥巡視光祿凡供御率立法定價諸瑣憚之竟忤權相謫杞縣丞至則建公塾萃諸生之資穎者督訓焉由是人文彬起尋陞臨晉去士子思之祀名宦蒞臨晉平徭清賦民建祠刻石頌德遷湖州同知董織造却羨餘萬金民立却金亭累官山西參政陽城介休間有盜數千據險爲患屢歲莫制顯忠冒矢石定其巢穴後告歸居家以孝友稱里人化之

保定成志

張詩宛平人自號崑崙山人初學舉子業於呂柟繼學詩文於何景明聲名籍甚會順天府試少尹令士人自負几入場詩遂拂衣

出絕意不應舉作汗漫遊

續唐志七十九

一意爲詩

宛平王志

所至留題

續

通志

與翰林江暉馬西元林楸易廖洞野呂柘諸公相唱和一時稱

盛入汴謁李夢陽夢陽與之夜宴瓶芝忽墮取以爲拌各賦芝拌

行至汝南視何景明疾相守七月景明卒乃還

宛平王志

歸居一畝之

宅隙地種竹每遇風雨

續唐志

則披襟相對欣然命酌興至輒跨一

蹇任所之中途雖迫於風雨饑寒不顧也杭守李士行稱爲春風

不足融其情醞醪不足況其味眞足以知詩也所著罵思結髮笑

琳七子等文雄奇怪變見者不敢以今人目之書法放勁得顛旭

素師遺意人謂懸之可以驅鬼

宛平王志

楊行中字維慎通州人

一統志

父疇敦孝友撫弟遺孤成立嘗拾遺

金歸其主

通州高志

行中嘉靖初進士

一統志

授浙江山陰知縣厚重廉

平善理繁劇凡興學勸農築隄捍海諸惠政次第畢舉報最擢監

察御史

通州高志

巡察遼東

魏輔唐志七十四

時巡撫呂經激兵變部議勦行

中請榜示諸城令亂者自相擒捕以贖罪從之兵遂寢

通州高志世宗

將幸奉天行中力諫上震怒

魏輔唐志

命廷杖會風變得免歷南京右

僉都御史揚子江巨盜黃勤等聚黨結盟徒肆擾行中密授弁兵

方略捕獲之餘黨盡散人呼爲江神累遷刑部侍郎奉命察鄭王

但列王驕僻狀而洗不軌寬釋株連數百人遷南京工部尙書疏

請博咨才略以備安攘因舉侍郎鮑象賢總兵俞大猷等從之時

倭寇猖獗南京城久圯請繕完以便防守遷南京吏部尙書行中

素遠嚴嵩

通州高志

嵩惡其不附己以考察罷歸

一統志

隆慶六年卒年

八十四其始爲御史也章凡十餘上皆允行左都御史王廷相稱

其剛直明練爲御史十年不調吏部尙書許讚將薦搢誼同列云

吾今薦一不譏面御史何如初救陶仲文於戍所仲文貴幸欲有

以報行中拒之曰彼非吾徒吾亦非彼德也行中年六十餘父卒

猶孺子泣所受祿悉贖族無吝家居恂恂如寒素通州高志敝廬蕭然

雖老猶不廢學一菽志嘗纂輯通州志略祀鄉賢子鎬通州高志

鎬字景卿萬厯三十七年舉人授山東泗水知縣揭天理二字於

堂政皆公允恤郵傳清賦役興利除弊悉裨於民性耿介尤不避

權貴自奉甚薄或謂之曰若此何用服官爲鎬正色答曰子豈溫

飽者流恐愧先人清白耳嘗與戶部尙書李三才講求慎獨誠意

之旨力行不懈易箴時謂諸子曰此時心上一物不著可以見先

公不愧矣亦祀鄉賢子世揚通州高志

世揚字二遠性穎敏通州高志善史學多識古人姓氏地里物產及翰

墨家瑣細事馬健順傳尤究心書學注蘭亭信化諸帖專論筆法故生

平作書不求貌似古人卒年八十所著有姬解潞水之什東郊風

雅癭瓢等集

通州高志

王儀字克敬文安人嘉靖二年進士除靈璧知縣

明史列傳

歲大祲道

殛相望民各烏獸散儀下車不及解衣卽拮鎖棄倉實與民設糜

以飼疫者所借以活全甚眾奸民有寇盜者至官府不敢問儀廉

得其素昵者明貸其罪籍以報請寇出入得信乃督捕人卒至火

其家盜來無所著邑遂靖

中丞王肅菴傳

以能調嘉定擢御史

一統志

巡按

陝西秦府豪占民產儀悉奪還民延綏大饑朝命陝西布政使胡

忠爲巡撫儀論罷之已巡按河南趙府輔國將軍祐棹招亡命殺

人劫斂積十餘年莫敢發儀偕巡撫吳山奏之奪爵禁錮會儀出

爲蘇州知府甫三月祐棹潛入都奏儀捃摭并訐都御史毛伯溫

以私憾入已罪且言臣嘗建醮祈皇嗣爲知府王天民訕笑請并

按問帝心知祐棹罪而悅其建醮語爲遣使覆按解儀伯溫任下

天民獄

明紀三十二

除儀名蘇州士民走闕下乞留帝不許

明史列傳會言

官亦交章論救復職得江西撫州

文安楊志

蘇州士民復走闕下乞還

儀至再不報歸懇於巡撫侯位位以聞帝乃許之至則歎曰

明史列傳

郡賦當天下什二而田額涸亡可考何以定賦賦不可以救吾誠

不能一日安其上遂曰沉思擘畫僚屬射循阡陌計丈

文安楊志

使各

縣爲籍

明史列傳

民毫釐不敢有所隱乃以八事定田賦而賦平以十

歲編徭役而役平以三法考課鈔而民之灌輸平

文安楊志

治爲知府

第一

明史列傳

擢按察副使兵備蘇松四郡

文安楊志

時巡撫歐陽鐸均田

賦

明史列傳

令賦最重者減耗米派輕齋最輕者徵本色增耗米

明史列傳

儀佐之以治蘇者推行於旁郡坐與操江王學夔討賊敗績停

俸戴罪未幾殪賊江中進秩一等遷山西右參政分守冀甯寇抵

清源城儀洞開城門寇疑引去按行所部築城郭積糗糧榆次平

定間遂皆有城

明史列傳

尋推僉都御史巡撫宣鎮當彫敝之後儀

大集賓佐講畫戰守利弊上十餘疏易將領之庸弱者于是拔才

能問疾苦飭廢墜申號令修器械嚴警邏節候望邊政一新

文安志

俺答犯龍門所總兵官郤永等郤之斬五十級

明紀三十二

儀進右副

都御史

明史列傳

巡撫如故會以邊情奪職廷臣交口推儀才幹旋補

陝西副使兵備肅州肅故有哈密遺種雜民間歲久滋蔓爲害計

徙之境外肅以崩

文安志

稍遷右參政復拜右僉都御史巡撫甘肅

未行

明史列傳

會俺答犯京師詔儀馳鎮通州仇鸞部卒掠民間捕而

笞之柵市門外鸞訴於帝逮訊斥爲民

一統志

生平清約自持既貴

食不重肉衣不裁綺兢兢如少時嘗曰君子立身必資于身者薄

係于物者輕故能處紛華而不染世以爲名言退居九年卒年七

十有八

文安志

著有陝西河南奏議各若干卷上谷奏議若干卷吳

中田賦錄若干卷

文安楊志

陸慶初子緘訟寃復官賜卹

明史列傳

緘字伯

默晚號愚谷自著愚谷山人小傳以見志隆慶進士授中牟令首

與僚佐約常祿之外以一錢入者有公評胥吏以一錢入者有公

法上下肅然先是黃河轉徙田額浸失其初緘履畝均賦清欺隱

之田若干頃修賈魯河長堤田絕水患毀淫祠以建橋梁民不病

涉邑舊有魯恭祠嘗以期望躬詣父老相謂曰魯恭遠矣吾不悉

何狀今里少吠廕野多馴雉公奚不若而慕之也緘聞而笑曰談

何容易余獨不愧此心耳尋推吏部驗封司主事去之日士民攀

留車軛不得行相率立生祠肖像以祀焉

文安楊志

累官按察使分巡

遼陽以知兵名

明史增王儀傳

每憑軾出關巡行邊塞周覽要害考求卒

乘教演戎車聚則爲城行則爲陣一切雄邊威敵之具無不畢陳

巡按御史陳登雲敘緘修守之功薦其才堪大用是年秋察道墮

相望緘奉命督賑隆冬親歷亭障手足皸瘃全活者二萬餘人尋與撫巡不合復失內閣意指詔致仕

沈涵大參
王四槐傳

徐珏字汝和涿州人少有膽智爲諸生屢試不第遂投筆學武登嘉靖癸未武進士授居庸把總時大同軍亂殺鎮巡官據城不下命廷臣往撫之携珏行珏至單騎入城曉以大義眾咸感泣事平賜白金三百兩遷大同都司歷副總兵庚戌敵犯京師奮勇鬪擊捷聞上撤御前饌賜之授都督僉事守大同以忤嚴嵩左遷保定鎮守是時敵薄浮圖峪珏拒戰八晝夜敵敗去後倭寇蹂躪閩浙珏率子姪爲先鋒夜抵倭巢大捷者三遷南京中府僉書值南京兵亂珏驅家眾戰於城中擒數十人梟其渠魁馬三死眾遂散轉北京後府僉書以老乞歸

涿州續志

楊淪字南郭涿州人嘉靖壬辰進士授戶部主事監石渠倉凡監

倉官例多所取給吏承風因緣爲奸淪獨取所支俸金悉碎鑿之大如粟日以一付謹愿吏以易魚蔬仍約市賈非此金市物者卽白之議吏罪自淪任監倉後賄賂請託俱不得行管河西務裁革積弊民咸以爲便未幾上以館局需人敕內閣吏部舉充以唐應德等十人奏上選七人淪與焉授翰林院編修朝廷大制作如九廟實錄屬淪成業爲多充嘉靖乙未會試同考官最稱得士視學山東校士湖南書院得優等者六人李攀龍爲首許邦才次之旣謝病家居教授生徒所著有翰林集南郭集

涿州吳志

陳堯字敬甫通州人嘉靖進士爲工部郎出守台州治行爲東南第一轉長蘆都轉鹽運使遷貴州按察使

錢輔唐志七十四

多以文學飾

吏治所至輒聚生徒講學南安人爲之築醒翁亭咸稱其品詣可

當廬陵

宛平王志

時採皇木取丹砂使者相望堯每事節省曰勿導荒

服以奢靡後巡撫四川轉南京工部侍郎總理河道會河淤沛下
堯乘小舟訪古廟碑記知刁陽可濟進遂引漕由湖而北決口以
塞以刑部左侍郎致仕卒

通州高志

所著有醒翁集

宛平王志

王佩文安人授工部主事陞員外郎分理清源嘉靖十七年值獻
皇太后梓宮還河深不盈尺佩密借朝陽湖水一夕而下眾異爲

神方嚴開以待時分巡道于廷寅者浙人也以鄉里私舟至固欲
啟開佩執不可于縛其吏卒撻之山東撫按以聞上怒逮于廷杖

死暨九廟成錄功受金綺之賜陸郎中出守慶陽府政績卓著撫

按交疏薦之自于之死浙人私以嫉佩竟以劾歸入慶陽名宦

文安

楊喬伊字良相三河人

蘇輔唐志七十四

嘉靖丙辰進士任安慶府推官

明刑慎獄一時呼喬青天

三河陳志

遷南京戶部郎中值兵變殺侍郎

黃某伊馳赴軍中諭以禍禍眾始帖然解散

蘇輔唐志

後以同事排擠

罷職歸

三河陳志

朱乾亨字子貞大興人性篤孝嘗割股以愈母疾嘉

靖辛丑進士授戶部主事有巨商以暮夜金相餉者却弗受陞懷

慶知府不賄上官約下以法爲貪墨者所擠輒拂衣歸懷民泣留

如失父母祠名宦

大興張志

馬慎字自修大城人父齡正德丁卯舉人任河南永甯令廉而有
爲慎忠勇天植居鄉多義讓爲諸生時歲貢己及慎念次貢李淮
年老讓淮先貢慎遂中嘉靖庚子舉人辛丑進士甫登第聞父有
疾堅請歸省父卒服除授戶部主事代州糧儲節積羨金十萬兩
悉入內帑誥褒美之有白金綵幣之賚再督理兵餉恤士卒慎出
入士馬騰飽除大同知府值庚戌之變練兵固守民賴以安未幾
丁內艱再除登州知府兩府俱有宗藩梗沮難治慎清正不苟無
敢譁者登州有海防慎以武略著於時陞湖廣按察司副使整飭

淮海道倭寇犯境慎統領親兵張祥等援勦親冒矢石經數戰斬
 獲倭級百餘奪獲盔甲器械巨艦有差捷聞敍功加一級銓曹方
 擬柄用值叅將王介乃總督趙文華倖弁仗勢奸猾出征畏縮不
 前慎竇申兩院介陰狡捏詞賂謀當路令慎回籍聽勘後介恐事
 白受顯戮服毒而死慎得補山西潞安道副使以疾卒於官大威張志
 劉體乾字子元東安人嘉靖二十三年進士授行人改兵科給事
中明史 傳司禮太監鮑忠卒其黨李慶為其姪鮑恩等八人乞遷級
 帝已許之體乾抗疏力爭乃止錄三人時園用絀廷議請追宿逋
 增賦額體乾獨言冗吏冗費之弊一統志 請革冗濫語侵內監時論
七十一 韞鐵輔唐志 累官通政使遷刑部右侍郎改戶部左侍郎總督
 倉場隆慶初進南京戶部尚書南畿湖廣江西銀布絹米積逋二
 百六十餘萬鳳陽園陵九衛官軍四萬而倉粟無一月儲體乾再

疏請貴戚有司又條上六事皆報可

明史列傳

隆慶三年夏四月詔取

太倉銀三十萬兩體乾言太倉銀所存三百七十萬耳而九邊年

例二百七十六萬有奇在京軍糧商價百有餘萬薊州大同諸鎮

例外奏乞不與焉若復取以上供經費安辦帝不聽體乾又言今

國計絀乏大小臣工所共知卽存庫之數亦近遺御史所搜括明

歲則無策矣今盡以供無益費萬一變起倉卒如國計何乃命止

進十萬兩帝嘗問九邊軍餉太倉歲發及四方解納之數體乾言

祖宗朝止遼東大同宣府延綏四鎮繼以甯夏甘肅薊州又繼以

固原山西今密雲昌平易州俱列成矣各鎮防守有主兵其後增

設召募增客兵而坐食愈眾各鎮芻蕘有屯田其後加民糧加鹽

加京運而橫費滋多因列上隆慶以來歲發之數

明紀三十七

又奏國

家歲入不足供所出而額外陳乞者多請以內外一切經費應存

革者刊勒成書報可

明史列傳

隆慶四年三月詔市綿二萬五千斤體

乾請俟湖州貢帝不從趣之急

明紀三十八

給事中李已言三月非絲

時不宜重擾商戶體乾亦復爭乃命止進萬斤

明史列傳

體乾清勁有

執議論務存大體有古大臣風時內供日多數下部取太倉銀又

趣市珍珠黃綠諸物體乾惜浮費每疏爭

一統志

李已輒助之會帝

從中官崔敏言命市珍寶體乾已執奏不從復偕同官陳吾德上

疏帝震怒杖已百鋼刑部獄斥吾德爲民

明紀三十八

體乾積忤帝意

一統志

秋七月奪官閒住

明紀三十八

給事中御史光懋御史凌瑄等交

章請留不聽神宗卽位起南京兵部尙書奏言留都根本重地故

額軍九萬馬五千餘匹今軍止二萬二千馬僅及半單弱足慮宜

選諸衛餘丁隨伍操練發貯庫草場銀買馬又條上防守四事竝

從之萬曆三年致仕卒贈太子少保

明史列傳

王遴字繼津霸州人嘉靖二十六年進士除紹興推官入爲兵部

主事歷員外郎

明史列傳

剛直矜節概不與交惟與同官楊繼盛善

統

繼盛劾嚴嵩及其孫效忠冒功事下部覆世蕃自爲藁以屬武

選郎中周冕寃發之反得罪尙書聶豹懼起所司以世蕃藁上

明史

傳遴力爭不可次日另具一藁呈聶聶擲於地曰君爲君子豹爲

小人矣竟覆如世蕃藁

續輔唐志七十一

繼盛論死遴爲資粥餽且以女

字其子應箕

明史列傳

嵩父子銜遴次骨乃摭他事下之詔獄事白復

官

續唐志

及繼盛死收葬之遷山東僉事再遷岢嵐兵備副使有威

名爲巡撫所忌劾去官民相率訟寃詔許起用四十五年擢右僉

都御史巡撫延綏

明史列傳

冬十月丁卯俺答犯定邊固原總兵郭江

敗死

明紀三十六

總督陳其學陝西巡撫戴才坐免遴貶俸一秩隆慶

改元寇六入塞皆失利去而御史溫如玉論遴不已解官候勘後

楊鈇勘上其功遂以故官巡撫宣府邊乃大興屯田邊儲賴之秩

滿進右副都御史尋拜兵部侍郎

明史列傳

神宗立又與張居正不相

能一統志

會議閱邊邊請行事竣邊移疾歸

明史列傳

居正歿起南京兵

部尚書奏行計安留都十二事軍政大肅召拜戶部尚書

一統志先

是奉詔蠲除及織造議留供銀百七十六萬餘兩命於太倉庫補

進邊言陛下歷十餘年之積不足償二年取補之資矧金花額進

歲當百萬自六年以後增進二十萬今合六年計之不啻百萬矣

庫積非源泉歲進不已後將何繼因言京通二倉糧積八百萬石

足供九年之需請量改折百五十萬石三年而止詔許一年

明紀四十一

一尚寶丞徐貞明

明史列傳

嘗請興西北水利時以財匱不能舉及謫

官南行

通鑑輯覽

至潞河終以水田議為可行

明紀四十一

又著潞水

容談論水利當興者十四事既還朝給事中王敬民

通鑑輯覽特

疏論薦遼亦力贊之帝乃進貞明少卿賜之敕令往會撫按諸臣

勘議

明史神宗紀

故事戶部銀專供軍國不給他用帝大婚督取濟邊

銀九萬兩爲織造費至是復欲行之遼執事未幾詔取銀四千兩

爲慈甯宮用遼又力持皆不納

明史列傳

遼陳理財七事請崇節儉重

農務督漕賦懲貪墨廣儲蓄飭貢市帝報日事關朕躬者已知之

餘飭所司議行時釋教大盛

明紀四十一

又請僧道年四十以下及無

度牒者悉令歸農

一統志

聚眾修齋者坐左道罪禮部尙書沈鯉請

如遼言詔許之后妃宦者多言不便事中止

明紀四十一

改兵部屏絕

請託

一統志

遼東鎮總兵官李成梁賂遺徧輦轂

明史列傳

獨不敢至遼

門遊之爲戶部尙書也頻執爭爲中官所嫉及改兵部申時行以

營事指揮羅秀屬遼補錦衣僉書遼格不許會帝將重閱壽宮中

官持御批索馬遼以爲題本當鈐印司禮傳奉由科發部無徑下

部者援故事執奏帝不悅時行乃調旨責違擅留御批失敬上體
御史因交章劾遂遷乞休去明紀四十一張佳允代之給事中張養蒙

言羅秀本太監滕祥奴賄入禁衛往歲營僉書尙書邊持正爲所

中傷去未幾秀卽躡用物議沸騰於是黜秀佳允亦罷邊雖退聲
望愈重以高年存問者再三三十六年卒贈太子太保天啟中追

諡恭肅

明史列傳

王鈇字德威順天人一統志

嘉靖二十九年進士授常熟知縣明史列傳

邑多大猾

續補唐志七十六

匿亡命作奸鈇悉黃其罪倭患起鈇語諸猾

曰何以報我

明史列傳

諸猾咸請效死

續補唐志

於是立耆長部署子弟得

數百人

明史列傳

分防訓練繕築城垣

續補唐志

三十四年三月倭自三丈

鋪分掠常熟江陰甲寅鈇與蘇松兵備副使任環指揮孔燾分統

官兵民三千破其巢於南沙斬首百五十有奇焚舟二十七餘倭

皆遁去乙巳賊分爲二北掠許臺南掠橫塘延蔓常熟江陰無錫

之境

明紀三十四

將由尚湖還海鈇憤曰賊尙敢涉吾地邪必擊殺之

會邑人錢泮字鳴聲者以江西參政里居忿倭熾其父柩力從史

贊鈇乃用小艇數十

明史列傳

追倭於上滄港

明紀三十四

倭夾擊之隘中

獨耆長數人從皆力鬪死鈇陷淖瞑目大呼腹中及死

明史列傳

贈太

僕少卿

一統志

並磨錦衣世百戶遣官諭祭立祠死所歲時奉祀

列傳

高敏學寶坻人

一統志

嘉靖庚戌進士授行人司以風節自勵視權

貴蔑如也擢兵科給事中時趙文華私人籍嵩勢益無忌敏學憤

甚具疏劾之帝大怒詰責敏學敏學侃侃不撓廷杖折脊絕節而

卒後嵩敗文華死

寶坻洪志

追贈光祿寺少卿仍恤其家

畿輔唐志七十六

毛

綱字伯練薊州人嘉靖進士授汝甯推官寘藩校於法

畿輔唐志七十四

志

崇王怒以刑威之

州志

綱不爲動

續唐志

王加禮焉

州志

出守杭州累遷戶部尙書致仕家居置義田獨內外貧族

續唐志

劉效祖字仲修京衛人夙有孝行

大興張志

嘉靖庚戌進士

宛平王志

理衛

輝平反無算遷戶部主事

續唐志

備糧儲督漕觀聲望日隆歷

員外郎中嚴嵩欲羅致門下婉謝之陞陝西固原兵備副使

大興張志

平涼馬苑恃奧援縱卒擾民效祖執之實於法一日敵入花馬池

效祖登城捍禦敵知有備引去尋爲忌者所中罷歸五原人扶老

攜幼號泣車前聲震四十里

續唐志

歸闕日涉園

宛平王志

寄情詞曲小

令可入元人之室如沈醉東風云東華路塵沙滾滾玉河橋車馬

紛紛官高休羨榮命蹇須安分靠青山緊閉柴門間把英雄細討

論能幾箇到頭安穩又一闌云門巷外旋栽楊柳池塘中新浴沙

鷗半灣水繞村幾朵雲生岫愛村居景致風流間吸盧仝茗一瓊

醉翁意何須在書朝天子云景陽宮曉鐘鳴珂巷玉馳總是南柯
夢生來無分紫泥封機巧成何用捉霧拿雲攀龍附鳳這心腸無
半種拄一條瘦筇引一箇小僮沿耕墮膳耕種又一闕云喜碧山
日親把銀魚早焚銷繳了功名分韜車鳩杖鹿皮巾也不讓黃金
印現景無多前程休問趁明時自在隱尋幾故人圍坐在簞門常
則把陰晴論入小山樂府中不能辨也昭陵嘗遣中使索其題冊
呼曰念庵念庵副使別字也因賦詩云更生雙鬢已蕭騷敢謂文
章擅彩毫過誤偶承明主問因緣不是鬱輪袍苑平古詞襍著共七卷所著有四鎮
三關志十二卷春秋稿二卷苑平古詞襍著共七卷張志弟繼
祖號逆菴性孝友博學多才與兄名齊一時由成均選松江府檢
校明習吏事歷官有廉能聲及擢昌黎丞遂疾歸語諸子曰吾平
生歷秩甚卑惟恪盡無忝存心不敢自欺耳以次子餘祐貴馳贈

通議大夫兵部右侍郎

宛平米志

宗禮字道周京衛人嘉靖中武舉累官神機營遊擊將軍奉命禦

倭

禮輔唐志七十六

禮驍健敢戰練士三千

明紀三十五

屢殲賊眾

禮輔唐志

嘉靖

三十五年徐海引大隅薩摩二島倭分掠瓜州上海慈谿自引萬

餘人攻仁浦胡宗憲壁塘樓與阮鶚相倚角海趁阜林鶚遣禮擊

之崇德縣三里橋三戰三捷辛亥

明紀三十五

倭眾萬餘猝至禮所統

不過九百人自寅至午所殺傷過當而禮亦身被重創兼糧盡乏

食後軍無救者遂力戰而歿事聞贈都督同知蔭一子指揮僉事

諡忠壯

禮輔唐志

李松大城人

禮輔唐志七十四

父淮鄂陵主簿松警晤不羣弱冠小試不

利因下帷攻苦嘉靖戊午舉人壬戌進士

王乘乘少司馬李公傳

任歸安令

時巡方使者按浙立清廉貪酷四牌諭各邑令自審政績立牌下

眾競趨清廉松獨立酷脾下使者驚異詰之松曰讀聖賢書叨甲

第頗知自愛貪則斷不敢出清廉亦自分未能歸安豪右世族非

嚴勿治酷或有之使者動色稱奇唐志密屬以緝捕豪勢因搆禍

幾不免謫州判正直之氣不以微官故少貶李公傳遷滕縣令唐志

繼主工兵曹政皆有狀李公傳累遷遼東甯前道僉事唐志丰稜表

著威惠並施李公傳歷十二載進副都御史巡撫遼東三年軍民悅

戴以報歸唐志

福時東安人本姓張福時其名也諳韜鈴善騎射世宗朝以世職

歷官漕運叅將值河決僨運八載飛輓爲諸郡先大學士徐階兵

部尙書楊博皆知之晉掛印總兵官鎮淮安督漕如故世宗常品

論羣臣有清不過福時勇不過馬芳之語及徐楊去國福亦罷歸

卒世宗凡敕時手書名而不氏故以爲改福姓云唐志

七十四

王价大城人少孤介動必循禮言笑不妄發長而讀書邑中每晨詣書舍道經先師廟必入揖乃往坐齋中雖盛暑未嘗去衣巾明世廟時以貢舉遊京師銓部顧芳春當代偉人也聞价名令二子受經焉逾年補江南無錫縣縣丞顧聞之駭然來謝曰公才宜作推知蓋早使我聞諸价怡然曰豈有受秩公朝而拜恩私第者乎故不敢願嘉歎再四而去無錫者卽顧里也舊例縣丞到任糧長初見白銀各五兩以爲贄禮里擴三百六十合之可得千八百金价至痛懲其弊皆併去一邑驚愕縉紳苞苴不行事不便民者與縣主每力爭堂官始怒甚旣而悔曰王公君子也以故官微而多惠政親友規以不近人情者卽正色曰如君之言必盡取無義之財始爲近人情乎言者愧謝而去卒於官貧弗能斂適顧解組回里感价之高潔同貲助之始得扶柩歸子應亭

王秉乘縣佐王公傳

王時舉順天通州人

明史楊思忠傳
吾其先江西人

洪武初始
祖英充錦衣衛從

州嘉靖四十年進士授河南府推官偃師縣有田黃二姓指腹約

婚黃生女秋雲田生男克普婚遂定後黃通顯田貧不能聘黃欲
寒盟女請於母密遣鄰姬約克普暮至某所遺以金使備禮娶歸
克普喜甚露其實於友朱龍沈橋龍橋思攘其貨醉克普酒暮造
約所果有金在地持以行時秋雲同鄰姬睨於旁姬訝非田生且
熟二人面呼其名叱之二人懼事露剝及掠金去克普醒往見兩
尸血淋漓仆地驚走遺一履不及躡血漬襟袖事發不能辨坐抵
罪時舉至疑其冤按之未決夜夢女子訴曰某某實殺妾者逮田
生枉矣覺而異之審寤中狀捕二人至一訊卽服發其金猶在也
抵以法田生得釋擢監察御史

通州高志

四十五年十月時舉劾刑部

尙書黃光昇言內官季永以訴事犯乘輿本無死比乃擬眞犯奸

人王相私闕良民者三本無生法乃擬矜疑宜勒令致仕帝怒明史

楊思忠傳謫徙延慶衛隆慶改元復官七十四 召補山西道御史巡

按貴州時戎備久弛土獠肆掠時舉檄各道督游核偵察之懸賞

厲戒期撲亂首分別土司地界界內有亂酋長連坐羣盜盡息時

陳皇后無子通州高志帝頗歎聲色陳皇后微諫帝怒出之別官外庭

皆憂之明紀三十七時舉於萬里外疏請正位中宮以端治本通州高志語

極切直唐志帝方廣市珠寶疏陳奢靡之害臺諫有被謫者申救

甚力至議屯田議鹽政議貴陽更置城邑無不切中時繁萬厯初

掌河南道疏請復建文年號大義侃侃通州高志累遷大理少卿卒續

唐志年四十六逾月妻董舉子實堅妾王亦有遺娠舉子實穎人以

爲天錫之嗣云祀鄉賢通州高志

崔鑑順天人年十三大興張志父嗜酒狎娼召與居娼恃寵時時陵鑑

母父又被酒數侵辱之一日娼惡言詈母母復之娼遂擊敗母面

母不勝憤入室伏牀而泣將自盡鑑自學舍歸問之母告以故鑑

曰母無死卽走至學舍挾及還娼適埽地且埽且詈鑑拔及刺其

左脇立斃乃匿及牖下亡走數里忽自念曰父不知我殺娼必累

我母明史列傳我安忍以爲母者累母耶大興張志急趨歸父果訴於官將

繫其母矣鑑至告捕者曰明史列傳殺人者我大興張志非母也眾見其幼

不信鑑曰汝等不信請問凶器安在自出及示之眾乃釋母繫鑑

寘獄事聞下刑部讞尙書聞淵等議鑑志在救母且年少可矜難

拘常律帝亦貸其罪明史列傳

王原文安人父珣貧窶苦里役謀於妻張氏曰吾單弱不能支門

戶今躬耕薄田數十畝其直不能辦一歲差使地去差存吾與汝

俱不免爲餓殍吾將逃焉汝母子守薄田勤紡績庶可存活別後

勿相念也出而不告所往張氏撫原兢兢以居原幼多病及長問父存亡母曰汝父累於貧棄家避差迄今已二十年矣

紀常王原孝子傳

大悲慟乃設肆於邑治之衝治酒舍諸行旅遇遠方客至則告

以父姓名年貌冀得父蹤跡久之無所得

明史列傳

一日跪其母前曰

吾將去尋父以歸母曰汝父去家二十年不通音耗尋可得乎原

仰天而號曰人而無父何以爲人泣與母別

王孝子傳

乃去之齊魯數

年至田橫島

居易錄

時日已西沉颶風甚急止宿於岔口口土神祠

王孝子傳

夜夢入古刹日當午見廊僧方炊就乞食僧與之一盂曰此

莎米飯也味苦爲汝澆以羹

居易錄

乃肉汁也曰甘乎曰甘已復口

誦偈授之曰如來如來眞箇來好去好去還須去忽聞刹啄聲而

寤

大泌山房集

一丈人攜杖而入問原奚自原以實對丈人曰鶴鳴于

天其子隨其影以周旋今形影不相屬而卒以相合不敢許爾

王孝子傳

子原告之夢丈人曰日當午南方也莎草根附子也調以肉汁附

子膾也急去當於寺中求之原謝而行抵輝縣入帶山夢覺寺

山有寺名曰夢覺曰慈報會大雪宿山門下居易一苾芻出見而駭之曰少年

何處人何以至此原喋曰文安人尋父而來曰識其顏乎曰不識

也引至禪堂住持哀而食之粥王孝子傳是時珣方在寺爲僧居易錄住

持素知珣文安人因召而問曰汝識此少年乎曰不識也曰同桑

梓曷敘寒溫珣曰汝父爲誰曰某珣呼原乳名不覺歎歎原曰是

也相抱而哭珣無歸家意曰拋棄妻子二十餘年有何顏面見汝

母原以頭觸地牽珣衣望住持哀而大號住持曰天作之合非人

力也強之行住持號法林詩僧也口占七言以贈之曰豐干豈是

好饒舌我佛如來非偶爾昔日曾聞呂尚之明時罕見王君子借

留衣鉢種前緣但笑懶牛鞭不起歸家日誦法華經苦惱眾生今

有此

子傳

原遂奉珣以歸年六十有四矣又二十年始卒

居易錄

司上其事聞於朝詔旌其門原年亦八十有四有子六人孫一十

五人曾孫二十有二人應霖應期舉進士

大泌山房集居易錄

李亨廷

名缺以字行

香河人生而穎悟偉軀美髯喜結交不論貴賤施

予不望報酬好獎進善類而能化惡縣有周猴兒者素無賴偵亨

廷出知厚攜伏百家橋將發矢劫之亨廷下馬前曰若非周猴兒

耶何無賴若此猴厲聲應曰饑寒迫耳亨廷曰男兒墮地何往不

得衣食乃假途緣林乎吾居邑里不見敬是吾德不修也乃取橐

中所有厚遺之且諭曰後勿復爲若然則棄東市者皆若曹也猴

兒感泣而去後遂易行從善通州役于四爲亨廷中表姪會臺使

者以訪事屬刺史而四與馮寶坻人某與張監生某睚眦久矣乃

重賄四欲置張於訪亨廷知之令四毀單以滅其跡張得免禍亨

廷亦不令知也先是歲歉饑民死者枕於道廷亨捐橐理朝陽菴
養里中殘疾無告者全活甚眾亨廷赴試河間府距邑四百餘里

聞廷亨名願議面者趾相錯也嘉靖間擢貢得館陶縣訓導不出

惟務耕讀家居聞邑長鳴金過門必正冠鵠立俟金聲絕乃止其

誠敬類此崇祀鄉賢

香河劉志

姜璧字元卿文安人

謙輔唐志七十四

生而馴謹篤學領隆慶庚午舉人

辛未進士

文安楊志

授安樂令邑有大俠王彥飛橫行鄉里睚眦殺人

兵備使者索之不得璧至召諸賊曹

謙輔唐志

語之曰若輩受賊縱奸

梟當死能縛王自贖當貸若梟眾恐願自效卽共爲具飯王中酒

伏健兒急縛之度已得王又虞有道劫者預飭尉率健卒逆之劫

者猝遇尉悉駭走遂逮彥飛至庭

文安楊志

立斃杖下眾凜然任五年

擢御史按淮上

謙輔唐志

時淮揚飢奸民以其間競爲私鑄商販不通

百姓嗷嗷幾釀大亂壁檄所司禁私鑄而亟發金錢萬餘倉粟數千賑之始以事聞全活甚眾於時黃水入淮淮大溢總河大臣與撫臣相掣肘而有司行河者率委之倖貳又有議罷范公舊隄勿修而別開支河者壁言佐貳權輕不如專任守令大臣事權不一難責成功宜罷總河以其事歸撫臣便又言河口外高內下

文安楊志

開支河則引倒流之潮恐開私販之路不若修范公廢隄使內水不出外水不入外不損鹽竈之地內不傷耕植之田疏凡數百言

皆鑿鑿可行部覆如議

文安楊志

以外艱歸服闋出按中州中州宗室

最眾而祿不給

文安楊志

巡撫御史褚鈇議稍減郡王以下歲祿均給

貧宗帝遣給事中萬象春就周王讓新會王睦檣號於眾曰裁祿之謀起於睦檣聚宗室千餘人擊之裂其衣冠上書抗詔

明史諸王傳

人情洶洶壁時方在道聞之卽疾馳人大梁捕其謀主袁東魯數

人令武卒列伍備非常始疏陳其狀有詔罪首惡而釋其黨中州晏然璧常言治大狷宜緩急則謀洩而易脫平大眾宜急緩則黨固而難安真名言也河南贖緩歲額四千後漸倍之璧曰此膏脂也非刑罰嚴峻何至是疏如舊額雖陳東達曹徐西接亳穎故設有兵巡道彈壓盜賊久而罷至是有議復者璧言增官則增費若改清運道兼屯鹽而以屯鹽道移駐睢陳則事專而費省議雖寢

識者是之

文安楊志

擢撫鄖陽罷歸孫銓

畿輔唐志

銓字總六別號山啟朗眉秀目方脣豐頤祖愛若握珠總角從高陽孫承宗授句讀以國器目之萬厯壬子舉人仕肥城令肥夙號難治至則一意與民休息立傳帖革坐簽民鮮追呼之擾有殺其妻而疑其鄰者獄具公驗其痕皆寸許疑斧形夫輒悟曰數日前其婿屠沽兒貸弗應蓋屠沽兒之解大輒也恆操斧云遂伏辜陸

光州牧時流氛孔棘光有兩城其北單弱而倉庫寄焉遂嚴修備卽一株一鏹不需民間而守禦備光人藉以無恐臺使者上其績擢杭州同知杭郡衝煩甲天下盜竊兇窟往來茗雷蕭湖間羣起標聚眾莫敢攖銓廉得其狀發奸擒伏卽市偷巷竊訊無弗獲擢漢中知府當兵燹後加意拊循勞瘁成疾罷歸

太守姜山啟傳

楊惟清字子廉先世自淮安徙通祖景芳業農家頗贍嘗遇一士人假甚詢之乃避難無依者款於家留三載去其人後登第來謝及任府尹數造門啟請景芳終不詣其署其高潔如此

通州惟清高志

少窮經史學問淹博萬厯元年舉人授山西太谷知縣潔已愛民多善政家居極謹厚犯亦不校里中有無辜罹法者力雪其冤嘗貸金於人弗能償焚其券弟惟洪惟洽相繼登甲乙科子八人皆力學次子若桐號虞律天啟元年恩貢生授江南雕甍知縣報最

將遷尋乞歸崇禎甲申城破爲流賊所執不屈死年八十餘惟洪子若梓字原育生有至性數歲父卒事母張以孝著登萬曆四十四年進士授河南信陽知州禁絕耗羨判決如神不以案牘假胥吏手著有申陽末議皆足爲吏治法初若梓甫莅政監司洪某意輕之易服矚其聽訟聞者密以告訊讞自若洪由是異其才凡疑獄悉委鞠焉歲旱步禱跪烈日中雨立至謂未霑足跪如故監司掖之起人感其愛民之誠居恆勸農桑興學校爲士子校文藝多所造就課最擢禮部祠祭司員外郎攝儀制司事值神宗光宗相繼崩熹宗嗣位大禮盛至若梓敬慎將事無越悉闕略廷議改元謂光宗初立詔以明年爲泰昌今一月而崩紀元焉屬若梓建言曰一年三君前代所無若仍以明年爲泰昌則無以處今上若遂以明年爲天啟則無以存先帝皆不可請以今年八月後改爲泰

昌元年明年爲今上天啟元年既存先帝之元又尊今上之統庶

於情理爲愜開臣九卿皆是其議具奏報可弟惟治

通州高志

惟治字

子理惟清弟性篤孝父母卒哀毀幾殆廬墓所晨夕長號不已登

萬曆二十年進士授河南南陽知縣地當孔道多供億惟治經紀

有緒不困郵傳值歲屨大疫亟請發廩以賑搆藥選醫多方濟之

活者幾萬人盜賊竊發設法掩捕悉駭散中使奉命開礦惟治力

爭南陽無礦宿成輸二百金以安山谷及民間廬墓大災後賦莫

辨婉論急公不以迫呼擾民聽訟矜宥小過惟豪強故犯務實之

法三年邑大治舉卓異第一擢刑部主事累遷郎中僭盛暑閱獄

見囚扉早閉多蒸鬱風氣憐之許每晨啟戶納涼若爲令居刑曹

九年遷河南布政司參政礦盜嘯聚民倉皇出走馳檄獲之盜卽

散擢陝西按察司致仕歸喜作樂府詞千言立就每歲按部使者

造門請謁謝弗見見亦不及私畿內有警與州守登陴畫地固守捐貲修城樓櫓屹然以資保障崇禎辛未年七十四卒季子若樞成進士歷官至御史著有香雪齋集通署詠行世

通州高志

王大用霸州人逮事敬皇帝爲奉御侍慈壽皇太后於仁壽宮毅皇帝時陞御馬監太監賜蟒衣內苑乘馬通顯矣然性刻廉剛直弗能下其儔輩以是不得久內庭出爲遼府承奉是時遼莊王病不能視事委政國如毛氏國如賈通書史沉毅有斷而大用從內佐之所釐正國家事不可勝道頃之莊王與國如相繼薨嗣王立王聰敏辯給而嗜利刻害及長多不法常出數百里外游獵有司莫敢止改無所憚然心獨憚大用大用好直諫王積弗能忍乃曰承奉老矣宜免朝請於是大用希得見王王少無子所幸樂婦生子置外舍久之王有瘵病度終無子乃取外舍兒內宮中時兒已

八歲詐曰宮人某氏子欲以聞於朝故事王子生承奉司郎具所
生母姓名及產媼狀鬪相長史乃得奏附玉牒王以其事下承奉
大用曰王安得有子承奉乃不識何宮人有娠及及產子狀不敢
奉令王大怒曰老奴敢爾者死邪於是盡捕大用諸用事者皆榜
笞數百被重罪欲以迫賜大用大用終不爲動王乃召大用繆爲
好語曰而不知予之爲病耶事成而後有主而富貴可長保獨奈
何爲他人忠大用伏地叩頭流涕曰老奴受國厚恩死無以報願
此事涉欺罔法例嚴甚王子非眞子外悉知之後有發者禍且不
測老奴死不敢奉命王謬謝曰承奉言是也乃以計給奪其印而
自署承奉名行之大用既見欺無可奈何懟以首撞壁大叫曰生
不幸爲刑餘又棄外藩今王所爲如是吾弗能匡救禍且及矣誠
不忍老見刑獄卽閉戶自經繩欲絕會有救者得甦日夜涕泣竟

至失明以死國人悲焉

張居正王承奉傳

華陽吳祖椿校